

Kolinita Tovetumagana Yadi Leta Nagona Paulo Givetokilumina

Kivemala

Kolinita ani fafali-nai Giliki yana ebaveimeya anamelala lakaina Medeteleniya Leyaga anataliya wagaine. Paulo yana toveya inuwanuwa vaita anayoo anafaiweya sikisiti analedi fifti tausani (650,000). Ada waka mali fafali wagaidiya ielaelai ada inaunau mali fafali wagaidiya, e ada wadedeku ebakaikaiwabu moyaidi. Ada kilumina moyaidi meKolinita ibubudi yadi yaubada fwayafwaya faidiya ani tova moyaina ioduodu wagaidiya, ada kaduwe udo anadewa lakaina wagaidiya.

Paulo yana balawalilivuga anavelu wagaine ginau Kolinita wagaine gimiya vaikoi eitini (18) aku Yeisu Keliso anavaleya iwakana kaliva givevewaledi. Ada kaliva moyaidi Paulo yana ifuifufu-dina inogalina ada Yeisu ivetumaganena.

Ada aimo Paulo Efeso wagaine gimiyamiya aku kaliva tufodi ielai Kolinita wagaine-deya ada Paulo iawatalatalainena vaita Kolinita yana ekalesiya wagaine vita tufodi bademowa iyege-mona, anafaiweya badi toekalesiya iludakana (1:10 - 4:21), toekalesiya udo anadewa idewadewayena (5:1-13), sakalameni keke ida vegugaiyedewedewe (11:17-34), ada tufodi ivonavona vaita keke toalika inayawa-vagila (15:12-33). Ada

kaduwe, meKolinita leta iimilina Paulo wagaine ke itolidadanena gaitoma tufodi faidiya e ada taide yana leta-nai wagaine Paulo yadi toolidadana-dina gifatadi (7:1, 8:1, 12:1, 16:1). Seyana gaitoma lakaina Paulo wagaine ani bana nuwanuwana Kolinita tovetumagana ani kaliva ina nuwanuwakabubuyedi (daba 13).

Vona vesiule. (1:1-9)

Vita tulina tulina yadi ekalesiya wagaine. (1:10 - 6:20)

Nagi anaveimeya faina. (7:1-40)

Keke gida luboda Keliso anavetumagana kana vetutamwai yaubada fwayafwaya adivetumagana nodi. (8:1 - 11:1)

Gavadewa tovetumagana adilauboda miyavagauta oduodu wagaine. (11:2 - 14:40)

Tovetumagana yadi yawa-vagila faina. (15:1-58)

Lauwage tulina tulina ada vetalakafoi. (16:1-24)

1-2 Iya Paulo. Yaubada yana nuwanuwa wagaine givenuwadadaneku ke giseku ada gaveafositolo Yeisu Keliso faine. Imi Yaubada yana kalivayavo wamiyamiya yana ekalesiya Kolinita wagaine, ani Iyayeku ada tubuiyada Sosideni nodi yama vesiule wagaimiya. Imi Yaubada bademowa giseliyemi Tauna faine ke gikivetabumi Yeisu Keliso wagaine,[†] ada givenuwadadanemi ke wana dewadewa yana kaliva tabutabudiyavo adilauboda anafaiweya. Aku keke vaita imiyavo gagana, aku kaduwe badi gavega Kauveya Yeisu Keliso wagaine iveoveola

[†] 1:1-2 1Kol 6:11

fafali seyana seyana wagaidiya, faina Banae ani badiyavo ke ideyavo nodi yada Kauveya.

³ Yaubada Tamada ke yada Kauveya Yeisu Keliso yadi nuwadogeya ina lemelememi ada kaduwe aseasemi ina kikiveniwalovidi.

Paulo givona vesiule Yaubada wagaine.

⁴ Tova moyaina gavesivesiule Yaubada wagaine imi faimiya, faina imiyavo Yeisu Keliso nodi waveseyana e ada Yaubada yana nuwadogeya aminuwakabubu tulina tulina bademowa givelemi.

⁵ Imi Yeisu nodi waveseyana faina, wai tulina tulina wagaidiya bademowa gilememe e ada amifata wanavona iwakana kadu yami alamana giveinala.

⁶ Taidei gaitoma-dina wagaidiya waseyegemonena vaita Keliso valeyana nagona aawamogatalena wagaimiya, ani velemono aseasemi gionana ke giveguwa iwakana yawaimi wagaidiya.

⁷ E ada waveitabodaboda yada Kauveya Yeisu Keliso yana yewa-vagila faina, aku Yaubada yana nuwakabubu-dina Aluwaluwa giavetavetala ani wagaidiya keke wada vemaufu, aku yana faisewa tulina tulina wagaidiya ani gikikivetoyogimi ke bademowa amifaiweya.

⁸ Ada Yaubada Tauna gina kikivetoyogimi ke wana mididi toyogina analaba ebalauyabu wagaine, e ada yadayada-nai wagaine yada Kauveya Yeisu Keliso gina yegemona,[†] tova-nai wagaine imi keke wa yami koyona Yaubada matane ada keke wa amivita faine.

[†] **1:8** Fip 1:6, 1Tes 3:13

⁹ Yaubada tova moyaina gigugugai anafaiweya givona, e ada adafaiweya kana vetumaganena. Banae givenuwadadanemi ke Natuna nodi wana vetubuiyana,[†] Banae Yeisu Keliso yada Kauveya.

MeKolinita yadi ekalesiya giludaka.

¹⁰ Tubuiyakuweyavo, yada Kauveya Yeisu Keliso anayeganeya gaveola toyogina wagaimiya, moyaimi yami nuwanuwa ina veseyana tubuiyamiyavo nodi. Keke wana luludaka, aku gilubodana yami nuwanuwa ke yami venuwadadana ina veseyana, e ada wana veyoo seyana.[†]

¹¹ Taidei anafaiweya gavonavona, faina kaliva tufodi ielai Kiloe yana yoo wagaine-deya, ani ikivealamaniku vaita taumiyavo wagavekwavek-wageya.

¹² Taidei gainanana faina taumiyavo waluludaka, ada tufomi wavonavona, "Imeyavo Paulo yana yoo," tufomi wavonavona, "Aku imeyavo ani Apolosa[†] yana yoo," tufomi wavonavona, "Aku imeyavo ani Pita yana yoo," aku tufomi wavonavona, "Aku imeyavo ani Keliso yana yoo."

¹³ Gavaiyamu-yo wanuwanuwa anafaiweya? Keliso vovona seya-moena, Bana vovona ani keke ida luidi. Tova-nai wana luidimi yoo yoo wagaidiya anafaiweya, ani vaita Keliso kabiso kabiso waluidina tulina tulina. Gaito ikivebolagalaga imi faimiya? Iya Paulo? Keke! Ada gaito anayeganeya wababitaio? Iya Paulo? Keke!

[†] 1:9 1Iyo 1:3 [†] 1:10 Fip 2:2 [†] 1:12 Gug 18:24-28, 19:1-2

14-15 Keke maita nuwanuwaku seyana gaito ginavona, “Iya Paulo anayeganeya gababitaíso, e ada Iya Paulo yana yoo.” Keke-mowa. E ada gave-siule Yaubada wagaine, faina keke tamo gaito wagaimiya gada kivebabitaíso, aku Kulisipasi† ada Gaiyasi† adiselu gagana.

16 O ika, Setefano† kaduwe yana manuwa anatomiyayavo nodi gakivebabitaísodi, aku nuwaku givulu kai tamo gaito kaduwe gakivebabitaísona.

17 Faina Keliso keke gida imiliku ke kaliva gana kivebabitaísodi, aku aiyada giimiliku ke valeya iwakana gana lumamaleña. Ada yaku laumamala wagaine, keke gada galuvaluva ke ananogala vaita Iya tonuwauya-mowa, keke.† Kai taide anafaiweya gada lumamala aga Keliso yana alika kelose wagaine, ani anavaleya anatoyogina gida vegaitoma-kavokavovo e ada keke gida veguwa kaliva aseasediya.

Keliso ani Yaubada yana nuwauya ke yana toyogina giseyegemonena.

18 Faina Keliso yana alika kelose wagaine anaifufu, ani gavega inaunau alika-vagata wagaine inoganogalina, ada wagaidiya ananogala anafaiweya tokwavakwava yadi vona, keke wa ananuwanuwa. Aku ide gavega Yaubada wagaideya gifaifaisewa ke gikikibababaleda, kaalamanena kelose anavaleya-nai ani velemonoena yana toyogina gikiveyegemonina.†

† 1:14-15 Gug 18:8 † 1:14-15 Gug 19:29, Lom 16:23 † 1:16 1Kol 16:15 † 1:17 1Kol 2:1,4,13 † 1:18 Lom 1:16

19 Anafaiweya ivetokilumina Buki Tabu wagaine, Yaubada givona,

“Babi taidei anatonuwanuwa velemoena ani
yadi nuwauya gana yawelina,
ada babi taidei anatoalamana yadi alamana
gana vegaitoma-kavokavovodi.” †

20 Taidei vona-nai faina, gavana Yaubada givona kaliva-dina badi tonuwanuwa velemoena faidiya? Ada kaliva-dina alaalamanidiyavo Yaubada yana veimeya faina, ani gavana Yaubada givona faidiya? Ada gavana givona toifufu-dina yadi ifufu nuwaabiabina faidiya? Nuwauya-nai babi anakalivayavo ikikilakaidi vaita gaitoma lakaina, ani Yaubada bademowa anavelemoena giseyegemonena. Keke nuwauya, aku velemoena ani nuwanuwa kwavakwava.

21 Yaubada yana nuwauya wagaine givenuwadadana ke babi anakalivayavo keke adifata Tauna ina alamane taudiyavo yadi nuwauya wagaidiya. E aku wai gisena badi ina vetumaganena faidiya e ada wagaine gina kibababaledi. Taine wai-nai ani Yaubada yana vona alulumamalena. Aku babi anakalivayavo wagaidiya, ani ananogala anafaiweya tokwavakwava yadi vona keke wa ananuwanuwa.

22 Badi meIsileli nuwanuwadi gugai ebameyasidobodobo ina itadi,† ada badi meGiliki nuwanuwadi vona nuwanuwauya ina noganogala ke ina vetonuwauya,†

† 1:19 Ais 29:14 † 1:22 Mad 12:38 † 1:22 Gug 17:18-21

²³ aku imeyavo ani Keliso yana alika kelose wagaine valeyana alulumamalena. Valeyana ananogala badi meIsileli wagaidiya, ani vaita kabala agedi gitutuna wagaine ibeu, aku badi keke meIsileli inoganogalina aga iawavekwavak-wavayena.

²⁴ Aku ide gavega bademowa Yaubada givenuwadadaneda ke kaawaegeda Banae wagaine, meIsileli o kai badi keke meIsileli, ani Keliso Banae Yaubada yana toyogina ke yana nuwauya velemoena giivemogatalina.

²⁵ Faina Yaubada yana nuwauya kaliva inuwanuwayena vaita kwavakwavana, ani velemoena gitubusegena kaliva yadi nuwauya. Ada Yaubada yana dewa kaliva inuwanuwayena vaita keke wa anatoyogina, ani velemoena gitoyogisegena kaliva yadi toyogina.**

²⁶ Tubuiyakuweyavo, taumiyavo faimiya wana nuwanuwa. Tova tuwaina imi gavega, e aku Yaubada gidouwemi ke wavetumagana. Tayuwe wagaine keke moyaimi tonuwanuwa velemoena babi anakalivayavo matadiya,[†] keke moyaimi totoyogina, ada tova tayuwe wagaine keke moyaimi ina ke tama kaikaiwabudiyavo.

²⁷ Aku badi gavega kwavakwavadiyavo babi anakalivayavo matadiya ani

** **1:25** Kaliva tufodi inuwanuwa vaita Keliso yana alika kelose wagaine ani keke wa anavuvu. Kaduwe anafaiweya, kaliva tufodi inuwanuwa vaita Yeisu gialika faina, Yaubada ani kabekabebena e ada yana toyogina keke anafata. Aku velemoena tova-nai Yaubada giawaenge Yeisu gina alika ada gisiveyawana, toyogina-nai givefaisewana ani lakai-moena ayo kaliva yadi toyogina.

[†] **1:26** Mad 11:25

Yaubada givenuwadadanedi, e ada badi gavega tonuwanuwa velemonoani gina kivevovomumudi. Ada badi gavega tokabekabebedi babi anakalivayavo matadiya, ani badi Yaubada givenuwadadanedi e ada badi totoyogina gina kivevovomumudi.

²⁸ Kaduwe badi gavega moyamoyakadiyavo babi anakalivayavo iitatagotagodi vaita badi keke wa adiyegana, ani Yaubada givenuwadadanedi[†] e ada badi gavega wa adiyegana lakaidi ani gina seobuye-moedi.

²⁹ Taidei wagaine keke seyana gaito anafata tauna gina kilakai Yaubada matane.

³⁰ Banae-nai gialiyemi ke Yeisu Keliso nodi waveseyana. Ada Yaubada Keliso giimilina ke nuwada gina kifolefolena e ada yana nuwauya kana alamanena. E, Banae yada koyona anaebaiyawela anawai gifaisewana ke ide yegayegadeyavo Yaubada matane kamiyamiya,[†] ada yada koyona analaufata Tauna gisena ke gitutuveobuda.

³¹ Tainei faina anafaiweya Buki Tabu wagaine givona,

“Kai gavega nuwanuwadi ina gakaikai,
gilubodadi KAUVEYA gagana faine
ina gakaikai.” [†]

2

Paulo gilumamala Keliso yana alika faina.

[†] **1:28** Iyem 2:5 [†] **1:30** Lom 3:22, Efes 1:7 [†] **1:31** Iyel 9:23-24, 2Kol 10:17

1-2 Tubuiyakuweyavo, tova-nai gaelai wagaimiya, nuwainagekuya gamadu veimeyeku vaita keke gavagaitoma faine gana ifuifufu aku Yeisu Keliso gagana faine, Banae-nai ikivebolagalagana. E ada Yaubada anavaleya gaawamogatalena wagaine, yaku vona-dina keke anafaiweya toalamana o kai tonuwauya yadi ifufu iwaka-vagaidi, keke.†

3 Ada Iya tova-nai ineneku imi nodi, yaku toyo-gina keke, ada wa yaku vetatava gamatamatauta.†

4 Ada yaku ifufu ke yaku laumamala wagaidiya, keke vaita gadavona nuwanuwauya ayo yaku vona wagaidiya nuwami gada vaidi. Aku aiyada Aluwaluwa Tabuna yana toyogina giseyegemonena,†

5 e ada yami vetumagana keke gina vevuvu kaliva-mowa yadi nuwauya wagaine, aku aiyada Yaubada yana toyogina wagaine.

Aluwaluwa Tabuna Yaubada yana nuwauya givevewaleda.

6 Aku badi gavega Yaubada yana nuwanuwa ivaivaina ke iveasekumaga wagaine, ani yama vewala inuwenuwena vaita avona nuwanuwauya. Aku nuwauya taidei ani tulina nuwauya-nai babi anakalivayavo ikikilakaina anafaiweya. Nuwauya taidei keke gida vevuvu badiyavo babi anakalivayavo o kai aditoveimeyayavo wagaidiya-deya, badi yadi miyami gina avaina, keke.

7 Aku nuwauya-nai aawamogatalena ani Yaubada yana nuwauya. Tuwai-bulubuluna

† 2:1-2 1Kol 1:17 † 2:3 Gug 18:9 † 2:4 1Tes 1:5

aimo Yaubada babi keke gidabubu, wa yana nuwauya wai gimadusena e ada ide yana tonogalayavo gina kilakaida ke wa yada iwakana kana miyamiya. Bana nagona keke gida ivemogatali, aku malinai giivemogatalina.†

8 Aku babi taide anatoimeyayavo, ani keke seyana gaito wagaidiya nuwana gidamali nuwauya-nai Yaubada wagaine. Kai ida alamanena, aga yada Kauveya wa yana iwakana mamalina ani keke ida kivebolagalaga.†

9 Taidei nuwanuwa-nai aifuifufuyena, ani tuwai-moena Buki Tabu wagaine ivetokilumina faine, ivona,

“Gavana Yaubada bademowa
gikidewedewedi
badi gavega inuwakabubuyena faidiya, ani
keke tamo gaito gidaita,
keke tamo gaito gida nogali gavana,
ada keke tamo gaito gida venuwatudadane.” †

10 Aku ide tovetumagana, ani wagaideya gaitomadina Yaubada giivemogatalidi Aluwaluwana wagaine. Aluwaluwa Tabuna-nai gaitoma matatabuna gialamanedi, e au kadu gavana Yaubada yana nuwainage wagaine gialamanena.

11 Waitana, gaito gialamane kaliva yana nuwanuwa? Kaliva-nai tauna aluwaluwana anakaibe gialamanena yana nuwanuwa. Kaduwe anafaiweya, keke seyana gaito anafata Yaubada yana nuwainage gina alamane,

† 2:7 Kol 1:26 † 2:8 Gug 13:27 † 2:9 Ais 64:4

aku Yaubada Tauna Aluwaluwana anakaibe gialamanena.

¹² Aku Aluwaluwa-nai kanuwagana ani keke vaita aluwaluwa tulina babi wagaine, keke. Aluwaluwa-nai ide kanuwagana ani gielai Yaubada wagaine-deya, e ada adafaiweya nuwada gina malina gaitoma-dina Yaubada wa yana nuwadoga givele-kavovoda faidiya.[†]

¹³ Ada taidei gaitoma-dina aifuifufuyedi, aku yama vona vuvuna ani keke kaliva yadi nuwauya wagaine, aku au Aluwaluwa Tabuna yana vewala wagaine-deya. E ada badi kaliva-dina wagaidiya Aluwaluwa-nai gimiyamiya, ani Aluwaluwa ginagonagoyema ke yana nuwanuwa akikivemalina wagaidiya.

¹⁴ Aku kaliva-mowa, badi gavega taudiyavo iawaawaegedi babi ananuwanuwa wagaidiya, ani keke nuwanuwadi Yaubada Aluwaluwana yana nuwanuwa, faina wagaidiya ananogala vaita gaitoma kwavakwavana. Badi keke adifaiweya yana nuwanuwa-dina nuwadi ginamali,[†] faina Aluwaluwa Tabuna gagana anafaiweya adialamana gina ivemogatalina e ada gina malina.

¹⁵ Badi gavega Aluwaluwa Tabuna ginagonagoyedi, ani adifaiweya gaitoma matatabuna ina itavenuwadadanedi ke nuwadi gina malina kai iwakana o kai koyona. Kaliva-nai taide anafaiweya, ani keke gavakaliva anafata gina itavenuwadadane ke koyona gina nuwaga bana wagaine.

¹⁶ “Faina gaito KAUEYA yana nuwanuwa

[†] 2:12 Iyo 16:13 [†] 2:14 1Kol 1:18

gialamane
e ada anafata gina kivetuvetunugi? Keke
tamo.” †

Aku ide wagaideya Keliso yana nuwanuwa Aluwaluwa Tabuna giivemogatalina, ani bade-mowa yada nuwanuwa wagaine.

3

MeKolinita yadi dewa iluvemogatalina vaita yadi nuwanuwa tuwaina wagaine-deya aimo ginagonagoyedi.

¹ Tubuiyakuweyavo, tuwaina Iya nodi kamiyamiya wagaine, keke akufaiweya gana ifufuyemi anafaiweya kaliva-dina kumagidiyavo gaifuifufuyedi, badi Aluwaluwa Tabuna ginagonagoyedi. Keke. Aku aiyada gaifufuyemi anafaiweya vaita kaliva iawaawaegedi taudiyavo yadi nuwanuwa gaga wagaidiya aku keke Yaubada yana nuwanuwa wagaine. Imiyavo au anafaiweya vaita biyabiyama kabikabisodi Keliso anaalamana faina.

² Yaku vewala wagaimiya ani anafaiweya susunai bebeta isususuna. Keke aa kwakwana lakaidiyavo ikani anafaiweya yaku vewala wagaine gada vekanimi, faina keke amifata wanavai. Aku kaduwe malina aimoina aa kwakwana keke amifaiweya,†

³ faina imi aimo taumiyavo yami nuwanuwa gaga wagaine waawaawaegemi. Taumiyavo yami dewa wana nuwenuwedi. Tufomi aimo

† 2:16 Ais 40:13 † 3:2 Ibel 5:12-13

wagaveuueumagigi, wa yami debai toyoga tau-miyavo yami nuwanuwa waimanimaniniyena, kadu nodi wagavekwavekwageya gaitoma tulina tulina faidiya. Taine yami dewa-nai giivemogatalina vaita aimo taumiyavo yami nuwanuwa gaga ginagonagoyemi, ada imi wadewadewa anafaiweya kaliva-mowa, badiyavo Yaubada keke ida alamane.

⁴ Faina tova-nai kaliva seyana ginavona, "Iya Paulo yana kaliva," ada kadu kaliva seyana ginavona, "Iya Apolosa yana kaliva," ani imi wadewadewa anafaiweya kaliva-mowa yadi dewa.†

Moyaidi gavega Kauveya yana faisewa ifaifaisewana ani badi au Bana yana togugaiyavo.

⁵ Apolosa banae vaita gaito? Ada Iya Paulo vaita gaito? Ida ime amaiselu au togugai, ada wagaimeya-deya Keliso wavetumaganena. Ime seyana seyana amaveimeya agugaiyena anafaiweya Kauveya givelema.

⁶ Iya gabakulina Yaubada yana vona aseasemiya vaita waifei anafaiweya,† ada Apolosa banae gikioioidi, aku Yaubada ani Banae gikivetabodi.

⁷ E ada gaito waifei gibakubakulina ada gaito gikioioi, ani badi keke adiyegana lakaina. Aku Yaubada Banae aa gikikivetabona ani Banae-nai anakaibe anayegana lakaina.

⁸ Gaito gibakubakulina ada gaito gikioioi ani badi togugai adiselu, seyana keke gida tubusege tubuiyana. Au adiyegana seya-moena. Ada

† 3:4 1Kol 1:12 † 3:6 Gug 18:4-11,24-28

seyana seyana Yaubada gina fatana yana gugai anafaiweya.

⁹ Ime amaiselu Yaubada nodi agugugai. Ada imiyavo ani vaita yana bakula, kadu vaita yana manuwa giyogoyogona.†

Badi gavega Yaubada yana yoo ikivetuvetunudi Bana yana vona wagaine, ina vaita manuwa iyo-goyogona Yaubada faine.

¹⁰ Ika, imiyavo yana manuwa, aku Iya Yaubada yana nuwadoga wagaine akuvutuga givелеku manuwa iyogoyogona faina. E ada vaita tonuwauya velemono manuwa anaavutuwa givemididina anafaiweya, Iya amiiyogona gave-butuna. Ada kadu kaliva iela imuliyeku ke manuwa iyogoyogona avutuwa-nai tabone. Aku toiyogona-dina gavega iiyogona avutuwa-nai tabone, ani gilubodana seyana seyana anaiyogoyogona gina itaveyabina.

¹¹ Faina avutuwa Yaubada bademowa gisei gimidimididi ani au Yeisu Keliso.† E ada keke tamo gaito anafata mali avutuwa gina vemididi.

¹² E ada kai tamo gaito manuwa gina iyogoyogona avutuwa-nai tabone ada gola, siliva, o kabala fatadi lakaidi gina iyogonayedi, wada iwakana. Aku kai tamo gaito gaitomakavokavovo gina iyogonayedi anafaiweya aimowa, laimwagu, o tabugala lukuna, aga gavaiyamu wanuwauwa?

¹³ Toiyogona seyana seyana yana faisewa aimo mogamogatalina. Faina yadayada-nai lakaina wagaine Yaubada toiyogona seyana seyana yana

† 3:9 Efes 2:22 † 3:11 1Pi 2:6

faisewa gina itavenuwadadanena, ada ai alalata wagaine faisewa-dina gina alailuvaluvadi. E ada ai-nai gina luvemogatalina kai toiyogona-nai yana iyogona iwakana o kai koyona.

¹⁴ Kai gavana kaliva giyogona avutuwa-nai tabone ani keke ai alalata ginaalai aku gina velubwaibwaina, aga toiyogona-nai analaufata iwakana gina nuwagana.[†]

¹⁵ Aku kai yana faisewa-nai keke wa anaiwakana ada ai gina ala-yabuna, aga toiyogona-nai aseasena gina tagiya lakaina. E aku banae tauna ani tovetumagana faina e ada auwe wa anakibababala ginamiya iwakana, aku anafaiweya vaita kaliva wa nima kagekagena giotaota aiyabeyabela wagaine.

¹⁶ Tubuiyakuweyavo, gavaiyamu, keke wada alamane? Imi moyaimi nodi ani Yaubada yana manawa tabu, ada Aluwaluwana wagaimiya give ebaga.[†]

¹⁷ Kai tamo gaito Yaubada yana manawa tabu gina luyavulena, aga kaduwe Yaubada kaliva-nai gina luyavulena. Faina Yaubada yana manawa ani tabutabuna, ada imi taumiyavo ani manawa tabu-mina.

¹⁸ Wana itaveyabimi. Keke iwakana taumiyavo wana fwayanegenegemi. Kai tamo gaito wagaimiya ginuwanuwa vaita banae tonuwanuwa velemono babi taidei anaalamana wagaine, aga gilubodana banae nuwanuwa-nai gida vedomobubusena aku tauna gida kiobuyena ada gida veanafaiweya banae kaliva kwavakwavana. Taidei wagaine banae

[†] **3:14** 1Kol 4:5 [†] **3:16** 1Kol 6:19

aimo gida vetonuwanuwa iwakana velemonoena Yaubada matane.

¹⁹ Faina babi taidei ananuwauya Yaubada matane ani kwava velemonoena. Anafaiweya Buki Tabu wagaine givona,

“Banae Yaubada badi tonuwanuwa velemonoena babi taidei anaalamana wagaine, ani givevedaiddi taudiyavo yadi edaeda vefwayafwaya wagaidiya.” †

²⁰ Ada kaduwe vona seyana givona,

“KAUVEYA gialamane-yabuna badi tonuwanuwa velemonoena yadi nuwanuwa. Au Banae wagaine ani nuwanuwa kavokavovo.” †

²¹⁻²² Taidei faina keke tamo gaito wagaimiya gida gakaikai amitonagona seyana gimulimuliyena faina. Keke wadavona, “Iyayeku ani Paulo yana kaliva, e ada akuyegana lakaina,” kadu keke wadavona, “Iya Apolosa yana kaliva, e ada akuyegana lakaina.” Kai Iya Paulo, o Apolosa, o Pita, ime moyaima ani imi faimiya. Kadu anafaiweya babi taidei, o kai yawaiminai wamiyamiyanena, o kai yami alika, o kadu gaitoma-dina imiyamiya malinai anatova-nai o kai tova gielaelai wagaidiya, ani gaitoma-dina matatabuna taidei ani imi faimiya.

† 3:19 Iyob 5:13 † 3:20 Sam 94:11

²³ Ada imiyavo ani Keliso faine, ada Keliso Banae Yaubada faine.

4

Yaubada Tauna yana togugai gina itavenuwadadanedi.

¹ E ada wada nuwenuwema vaita ime au Keliso yana togugai Yaubada givetumaganema ke yana nuwanuwa ana itaveyabina ada ana kivemalina kaliva wagaidiya. Nuwanuwa-nai nagona keke mogamogatalina, aku malinai giawamogatalena.

² Ada badi togugai-dina yadi kaliva lakaina yana gaitoma iitaitaveyabidi ani gilubodana tova moyaina wa yadi idibumwaiga ina itaitaveyabidi iwakana, ada wa adivetumagana.

³ Aku kai imiyavo o kai tamo kaliva vonayavuga wagaine yaku faisewa wana itavenuwadadanena ke wana awaveiwakanena o kai wana awavekoyoyena, ina wagaikuya gaitoma kabiso-moena. Kadu Iya tauku anafaiweya, keke akufaiweya ganavona yaku faisewa iwakana o kai koyona.

⁴ Iya tauku galutovoniku vaita keke tamo koyona gadagai, aku tauku yaku itavenuwadadanai ani keke gida awavelemoenayeku vaita Iya toyegayegana. Aku Banae-nai giitaita venuwadadaneku ani Kauveya Tauna.

⁵ Taidei faina keke kaliva wana-madu itavenuwadadanedi ke wana-madu awavekoyoyedi o kai wana-madu awaveiwakanedi. Aiyada wana segedi inamiya aku Kauveya yana tova wana bodana.

Faina tova-nai gina yewaelai ani gavana matatabuna sewasewavuyena yuyuvana wagaine ani Banae gina seyegemonedi malina wagaine, ada kaduwe kaliva aseasediya yadi nuwanuwa vuvudi gina seyegemonedi. Ada tayuwe tova-nai wagaine kaliva seyana seyana yadi dewa anafaiweya ani adiawadavadava ina nuwagana Yaubada wagaine.

⁶ Tubuiyakuweyavo, taidei yaku ifufu-dina moyaidi wagaidiya Apolosa ke Iyayeku gasema ebaita, e ada gina lememe ke amitonagona moy-aima faimeya wana nuwanuwa tunutunugina. Keke iwakana tonagona seyana wana muliye ke taumiyavo wana kikirakaimi faine, ada wanavona vaita imi lakaimiyavo ayo badi tonagona velugana imulimuliyena. Taidei dewa-nai ani Buki Tabu yana ifufu keke gida mulimuliye.

⁷ Tubuiyaku, keke tamo gaito gida nuwenuweni vaita o ayegana lakaina ayo tubuiyamomo, keke. Ada kaduwe, ya iwakana ke gavana wagainiya ani matatabuna Yaubada giveleni. Keke tauni wagainiya ida yegemo, e ada keke wa ya vuvu ayo tauni ayegana una kikirakai.

⁸ Waitana, wanuwanuwa vaita Keliso anaalamana matatabuna faina bademowa amifaiweya, vaita bademowa wavekaliva. Aku keke. Wanuwana vaita vutuvutuga-dina Aluwaluwa Tabuna giveleveleda ani bademowa imaga iaiwaiwadi wagaimiya. Aku keke. Wanuwana vaita wakaiwabusegema e ada wa amiyegana lakaidi wavebutu waveiveimeya Keliso nodi vaita kiniyavo anafaiweya, e aku imeyavo ani kokoyomeyavo. Aku keke. Kai yami

vona ani vona velemonoena, ina iwaka-moena. E ada nodi kada vekini ada kaliva kada kulikuligadi, aku keke.

⁹ Aku velemonoena ani ime keke vaita kini anafaiweya e ada aveiveimeya, aku aiyada ganuwanuwa ani vaita Yaubada ime afositoloyavo giseyegemonema vaita amayegana kabiso-moedi. Ime vaita mali yoo tolugaviya nibaidiyavo-dina anafaiweya, badi ikiveyabima ada inagoyema inauwema ke ina luvealikama, e ada babi anakalivayavo kadu aneloseyavo ke yoo lakaina imatawabuwbuyema.

¹⁰ Ada imeyavo yama awaegena Keliso faine ani amaita kaliva wagaidiya vaita kwavak-wavameyavo anafaiweya, aku imiyavo ani tau-miyavo waseyegemonemi vaita Keliso anaalamana wagaine ani velemonoena amifaiweya. Ada kadu ime kabekabebemeyavo, aku imiyavo ani totoyogina! Imiyavo idavadavami evona vaita imi kaliva lakaimiyavo, aku imeyavo amave-moimoina ani keke. Ivona ime au kalivakavokavovo.

¹¹ Tova nagona ada gielai malinai, ime mafalavuga ke meyakwakwa amiyamiyanena, ada nuya koyodi aoseosedi. Kaduwe imunumunuma, ada tova moyaina anunudadana aku yama manawa vaita wagaidiya ana miyamiya ani keke.[†]

¹² Kaduwe taumeyavo nimameya afaifaisewa toyogina amalema faina.[†] Kaliva iawalakalakavema wagaine, au aveoveola Yaubada wagaine ke wa yana nuwadoga

[†] 4:11 2Kol 11:23-27 [†] 4:12 Gug 18:3

gina gugai iwakana wagaidiya.† Ada tova-nai kaliva ikiveuloulolonima Keliso anayegana faina, au aatuvefailedi aku amididi toyogina.

13 Ada kaliva iveveloima e ada amayegana ina kikivekoyona, aku au nuwabikeya alulufata wagaidiya. E ada tova nagona wagaine-deya gielai ada aimo malinai anafaiweya, ani ime vaita babi anayogo bwanebwanebwanema babi anakalivayavo matadiya, ada au iitaitatagoma ke ivegaitoma-kavokavovoyema.

14 Taine vona-dina gavetokilumidi ani keke vaita gada kivevovomumumi faina, aku imi natukuweyavo ganuwakabubuyemi e ada nuwanuwaku gana kivetunumi.

15 Faina amitovewalayavo ivevewalemi Keliso faina ani moyai-vagaidi, aku tamamiyavo keke moyaidi. Aku tova-nai anavaleya iwakana gaawatalatalainena wagaimiya ada wavetumagana ke waluku Yaubada yana gabu wagaine, taidei wagaine Iya gavetama wagaimiya.

16 Ada imi natukuweyavo faina, gavon-avona vagadonemi ke wana muliyeku tavagiku wagaine.†

17 Au taine vuvuna-nai faine Timoti gaimili gielai wagaimiya. Yeisu yana gabu wagaine ani banae natu aseaseku,† ada giidibudibumwaiga velemonoena. Ada banae gina kivenuwaududumi ke gina kivemalina yaku edaeda Yeisu Keliso faina, taine edaeda-nai gavevewalayena Keliso yana yoo imiyamiya fafali moyaidi wagaidiya anafaiweya.

† 4:12 Luk 6:28 † 4:16 1Kol 11:1, Fip 3:17 † 4:17 Fip 2:22

18 Gaalamanena tufomi wavonavona vaita keke ganaela gana madubodami, e ada taumiyavo amiyegana wakikilakaina.

19 Aku kai Yaubada yana nuwanuwa anafaiweya, aga tova kabisona ganaelai wagaimiya. E aku keke ganaela ke alamana ganavai tonuwalaka-dina yadi ifufu faina, aku aiyada gana itana kai Yaubada yana toyogina wagaine ifaifaisewa o kai ivona-kavokavovo.

20 Faina Yaubada yana ehaveimeya ani keke gida miyami ifufu wagaine aku Yaubada yana toyogina wagaine.†

21 E ada gavana nuwanuwami tova-nai gana yegemona ineneku? Kai ganaela gana ogala wagaimiya, faina yami dewa koyodi aimo wamiyamiyanedi? O kai wa yaku nuwakabubu ke bonaku bikana wagaine ganavona asevatumi, faina bademowa yami dewa koyodi wasegedi? Imi taumiyavo wana nuwanuwa faine.

5

*Vovo anaawaega-kavokavovo anadewa
Yaubada yana kaliva adimwatuguya.*

1 Aku amivaleya seyana koyona ganogalina ani vovo anaawaega-kavokavovo anadewa gimiyamiya imi tovetumagana amimwatuguya, taine kaliva seyana wagaimiya ani tauna tamana vavinena giudoudoyedi. Aku badi gavega Yaubada keke ida alamane e ani gavaiyamu, tamo gaito wagaidiya dewa-nai gidewadewayena? Keke-mowa.

† 4:20 1Kol 2:4

² Aku imiyavo ani wanuwanuwalaka! Imi wa yami alamana, aku au tova manamanawena wanuwanuwalaka vaita imi velemonoena iwakana Yaubada yana wai wagaine. Kai wada nuwanuwa tunutunugina, aga nuwami gida vita-mowa ke wada tagitagiya taide dewa-nai faine, ada kaliva-nai wada veyegemonina yami yoo wagaine-deya. Aku keke wada gugaiye.

³ Iya keke nodi kada miyami ineneku aku yaku nuwanuwa aseasekuya gimiyamiya wagaimiya, e ada vaita ide kada miyami seyana. E ada bana kaliva-nai yana dewa koyo-moena gigugugaiyena ani analaufata analauboda bademowa gavenuwadadanena gina nuwagana.

⁴ Taidei faina Iya ganavona wagaimiya taide anafaiweya. Tova-nai wana vagauta Kauveya Yeisu anayeganeya ada yana toyogina gimiyamiya wagaimiya, ada Aluwaluwa Tabuna giseda seyana wagaine e ada vaita Iya nodi kamiyamiya anafaiweya,

⁵ e ani kaliva-nai wana veyegemoni gina yegemona yami yoo ke yami miyavagauta wagaidiya, ada Seitani nimane wana atuegena.[†] Banae kaliva-nai tova moyaina giawaawaegena tauna yana nuwanuwa gagana wagaidiya, wada edaeda-nai koyona, e ada Seitani yana veimeya dibune ani banae yana miya koyona velemonoena gina lutovonina. Taidei wagaine taine yana edaeda-nai gina itanuwigana ada gina segena. E ada aimo tova-nai Kauveya Yeisu ginayewa-vagilena, ani banae wa anakibababala gina miyamiya iwakana.

[†] 5:5 1Tim 1:20

⁶ Imiyavo wagakaikai vaita imi velemoena iwakana Yaubada yana wai wagaine, e aku kaliva taidei ani au waawaawaegena ke yana dewa koyo-moena aimo ginaunauwena amimwatuguya. Keke maita iwakana! Maita waalamanena falawa anayisti kabisona anafata gina gugai falawa anaetowava lakaina wagaine, aiyo?[†]

⁷ Kaliva-nai yana dewa koyona ani anafaiweya falawa anayisti tuwaina. Ada wanasege ginanau e ada yami yoo gina veevagu anafaiweya falawa evaguna keke wa anayisti.** Velemoena imiyavo bademowa vaita falawa keke wa anayisti anafaiweya, faina Keliso, Banae yada sifi natudi Nugulina faina[†] ani bademowa ivebolavoiyena.

⁸ E ada tova moyaina Nugulina anadewa kana dewadewayena ke kana vemwamwalena. Keke kana nuwainage gavakaliva anakivekoyo faine aku kadu Nugulina kana vemwamwale. Keke. Taidei dewa-dina ani vaita yisti tuwaina meIsileli isegena anafaiweya. Aku aiyada wa yada aseawaega ada yada nuwanuwa velemoena wagaine kana vemwamwalena, wada anafaiweya beledi keke wa anayisti.

⁹ Nagona yami leta gaimilina wagaimiya ada gavonemi, gavona, “Kaliva gavega vovo anaawaega-kavokavovo idewadewayena ani

[†] 5:6 Gal 5:9 ** 5:7 Yisti ani giveebaita kaliva yadi dewa koyodi faidiya, e ada meIsileli adiveimeya seyana ani tova-nai Nugulina anatova gina yegemona, yisti ina segena aku beledi keke wa anayisti ina kanikani, ada ina vemwamwala ke Yaubada ina kikalakaina. (Iyeg 12:1-21, 12:34, 13:3,7-10, 23:18) [†] 5:7 Iyo 1:29

keke nodi wana luluveya.”

¹⁰ Aku keke gadavona badi keke tovetumagana faidiya, badiyavo vovo anaawaega-kavokavovo idewadewayena, o kai giba ilugafugafudi, o kaliva yadi giba iyaudi-kavokavovo, o kai ioduodu yaubada fwayafwaya wagaidiya. E, keke badi faidiya gada vonavona, keke. Kai babi anakaliva koyodiyavo moyaidi wadaota-yabuyabudi taide anafaiweya, aga imi amilauboda kaduwe babi matatabuna wada miyasegena. Faina melala moyaina wagaidiya koyona gimiyamiya. Keke amifaiweya.

¹¹ E aku yaku ifufu-nai ananuwanuwa ani taidei anafaiweya. Gaito tauna givewagana tovetumagana ke tubuiyada Keliso yana gabu wagaine aku kaduwe vovo anaawaega-kavokavovo gidewadewayena,[†] o kai giba gilugafugafudi, o kai gioduodu yaubada fwayafwaya wagaidiya, o kai kaliva giawalakalakavedi, o gufa toyogidi giyuyuga, o givefwayafwaya ke kaliva yadi giba gikiyakiyafudi. Kai kaliva seyana yana dewa anafaiweya, aga wanamiya atuwada wagaine. E, keke wana kwayabu kadu keke nodi wanakani.

¹²⁻¹³ Badi keke totafalolo aku tafalolo melaleya imiyamiya, ani Iya keke wa akuveimeya ke gana vevonayavugidi ada gana kivetunudi. Wada-nai Yaubada Tauna yana gaitoma ke gina vevonayavugidi. Aku badi totafalolo imiyamiya tafalolo negenine ke nodi wavagavagauta ani kai ina dewadewa koyona, aga imi tovetumagana amilauboda badiyavo

[†] 5:11 Efes 5:3,7

wana vevonayavugidi ke wana kivetunudi. Ina imi amiveimeya. E ada kaliva-nai koyona amimwatuguya ani wana veyegemoni ginanau.†

6

Yaubada yana kaliva ivevevonayavuga adilauwage.

¹ Aku tubuiyakuweyavo, kaduwe ganavona. Kai tamo gaito imi tovetumagana wagaimiya tubuiyana nodi ina gavekwavekwageya, ada gavaiyamu-yo gisisidamane ada tubuiyananai ginaunauwe vonayavuga faine babi anakalivayavo ina vevonayavugidi, ani badi keke ida alamane Yaubada? Ina keke maita gida luboda. Tainei vita-nai ida nauwena Yaubada yana kaliva tabutabudiyavo wagaidiya, e ada badi ida kivetunugina faidiya.

² Kai keke wada alamane ide Yaubada yana yoo tabutabudeyavo ani adaveimeya aimo babi anakalivayavo kana vevonayavugidi? E ada kai imi wagaimiya badi adivevonayavuga ina nuwagana, aga gavaiyamu? Keke amifata vita kabisodi amimwatuguya wana kivetunudi, aiyo?

³ Velemoena, ideyavo ani aneloseyavo kana vevonayavugidi. E ada kai taidei anafaiweya, aga imi amifata-mowa wana vevonayavuga gavekwavekwageya-dina yada miyami wagaidiya.

⁴ E ada kai yada miyami anagavekwavekwageya-dina iyegeyegemona amimwatuguya, ani gavaiyamu-yo wavai

† 5:12-13 2Vei 17:7, 19:19, 22:21,24, 24:7

wanaunauwedi tovevonayavuga badi keke tovetumagana wagaidiya? Badi keke wa adiyegana Yaubada yana ekalesiya wagaine nonogana au nimadiya wasesedi.

⁵ Taidei anafaiweya gavona ke wana vovomumu. Taumada kaliva tonuwanuwa velemoena seyana gida miyamiya amimwatuguya, e ada anafata tubuiyamiyavo yadi gavekwavekwageya gida kivetununa.

⁶ Aku taumada tovetumagana seyana tubuiyana yana koyona faina gisimana kabemali wagaine, ada au badi keke tovetumagana aku wagaidiya inauwena ke ivevonayavugina. Tainei keke gida luboda.

⁷ Kai imi taumiyavo wavevevonayavuga ani keke iwakana Yaubada matane, e aku vaita Keliso anamuliya faine velemoena wakabek-abebena. Aku dewa iwaka-moena ani kai tovetumagana gifwaya wagaimiya ada yami giba giyaudi-kavokavovo, aga au anauloulolo-nai wana atuvefailena.[†]

⁸ Aku keke wada dewadewa iwakana. Imi taumiyavo wagugai koyona tubuiyamiyavo wagaidiya ada yadi giba wayaudi-kavokavovo. Badi tubuiyamiyavo nonogana au dewa-dina wagugugaiyedi wagaidiya.

⁹ Gavaiyamu, kai keke wada alamane? Badi gavega tova moyaina dewa koyodi ifaifaisewadi, ani keke-mowa inaluku Yaubada yana eboveimeya wagaine. Keke vefwayafwaya wana vevetumagane e ada wana nuwanuwa sidamana. Badi gavega vovodi iawaawaenge-

[†] 6:7 Mad 5:39-40

kavokavovodi, ada badi yaubada fwayafwaya isesedi wai inagona aseasedi wagaidiya, ada badi toudoudo, ada badi kaliva ke kaliva ivetuvetubo,

¹⁰ ada badi tokiyafu, ke badi aseasediya iamoumoula, ke badi toyuga faila tova moyaina ivekwavakwava, ada kaliva gavega vona koyona ivonavonayena kaliva wagaidiya, ada gavega toyaudi-kavokavovo, ada matatabudi kaliva taidei anafaiweya ani keke seyana ginaluku Yaubada yana ebaveimeya wagaine.†

¹¹ Tuwaina, tufomi kaduwe dewa-dina anafaiweya wadewadewayedi. Aku yada Kauveya Yeisu Keliso anayeganeya Yaubada Aluwaluwana wagaine gikiveyegayeganemi, gikivetabumi, ada giawaveiwakanemi ke gisemi yegayegamiyavo Tauna matane.†

*Vovoda anavegugai-kavokavovo
kana velovelovogena.*

¹² Kaliva tufodi ivonavona taide anafaiweya, ivonaga, “Dewa moyaidi ani Iya wa yaku veimeya ke gana gugaiyedi. Keke adiawata aku iwakana matatabuna.”

Aku Iya gada lufata, gadavona, “Ina iwakana, aku keke dewa moyaidi wagaidiya iwakana kana nuwaga. Ada kaduwe keke tamo gavadewa gana awaage ayo gina vetoveimeya wagaikuya e ada keke akufaiweya ganasege.”

¹³ Ada kaliva tufodi ivonavona taide anafaiweya, ivonaga, “Aa ani bana kamoda faine, ada kamoda-nai aa faine. Ada aimo tova-nai Yaubada vovo evaguna gina veleda, gaitoma-dina iluwe

† 6:10 Efes 5:5, Ive 22:15 † 6:11 Tai 3:3-7

ina avaidi. E ada gavadewa kagugaiyena vovoda wagaidiya, ina babi anagaitoma-kavokavovo.”

Aku Iya gada lufata taidei anafaiweya. Vovoda keke ida miyami e ada kana awaawaegge-kavokavovodi, keke-mowa.[†] Bana vovoda gimiyamiya e ada wagaidiya Kauveya yana nuwanuwa kana mulimuliyena. Ada Kauveya ani vovoda giitaitaveyabidi.

¹⁴ Waitana, Yaubada yana toyogina wagaine yada Kauveya gisivemididina alikeya, ada ide anafaiweya kaduwe aimo gina sivemididida alikeya.[†]

¹⁵ Gavaiyamu, kai keke wada alamane? Moy-aida Keliso nodi kaveseyana ani Banae ide nodi anafaiweya vovo seya-moena. E ada gavaiyamu, analauboda talai seyana Keliso vovone kanavai kana tubona wai dobona anavavine vovona wagaine ke nodi ina vevovo seyana? Keke, keke-mowa.[†]

¹⁶ Wana nuwenuwena. Kai gavakaliva gitubo wai dobona anavavine nodi ani bademowa ivevovo seyana. Vona bademowa ivetokilumina givona, “Adiselu ina vevovo seyana.” [†]

¹⁷ Aku gavakaliva Kauveya nodi itubo, ani bana kaliva-nai aluwaluwana ke Kauveya Aluwaluwana ivealuwaluwa seyana.

¹⁸ Taidei faina koyona-nai vovo anaawaega-kavokavovo ani wana maduota wagaine. Faina koyona moyaina kaliva igugugaiyedi ani anafaiweya imiyamiya vovodi wamelaleya. Aku kai vovo anaawaega-kavokavovo ina dewayena, aga

[†] **6:13** 1Tes 4:3-4 [†] **6:14** Lom 8:11, 2Kol 4:14 [†] **6:15** 1Kol 12:27

[†] **6:16** Eba 2:24

idewa koyona taudiyavo vovodi wagaidiya ke ikikivekoyodi.

¹⁹ Nuwami gida malina. Vovomi ani Aluwaluwa Tabuna yana manuwa tabu, Aluwaluwana-nai Yaubada givelemi ke gimiyamiya negenimiya.[†] Imiyavo keke toinavuvuna taumiyavo wagaimiya.

²⁰ Yaubada anakaibe amitoinavuvuna, faina imi faimiya fatana lakaina^{**} gisena. E ada Yaubada wana kikelakaina yami dewa-dina wadewawayedi vovomi wagaidiya.

7

Nagi anaveimeya faina.

¹ E, aku toolidadana-dina wavetokiluma yaku leta-nai wagaine ani gana lufata faidiya.^{**} Imi wavetokilumina, “Kai kaliva keke vavine nodi inada, wada iwaka-moena.”

² E aku vovo anaawaega-kavokavovo anaaladibidibi gimiyamiya faina, gilubodana kaliva seyana seyana gidanagi ke vavinena nodi ida miyamiya, kaduwe anafaiweya vavine seyana seyana gidanagi ke moganedi nodi ida miyamiya.

[†] **6:19** 1Kol 3:16, 2Kol 6:16 ^{**} **6:20** Fata-nai lakaina Yaubada gisena ani Natuna Yeisu Keliso giimilina ke yawaina giawaegena faideya. (1Pi 1:18-19) ^{**} **7:1** MeKolinita leta imilina Paulo wagaine ada toolidadana gaitoma tulina tulina faidiya, ada Paulo taidei maita-nai wagaine givebutu gilufata faidiya. Ada taide buki-nai wagaine 7:25, 8:1, 12:1, ada 16:12 wagaidiya kaduwe yadi toolidadana tulina tulina gilufata ke gaitoma-dina faidiya givewavewala.

³ Kaliva ke vavine inagi wagaine, kai kaliva vavinena nuwanuwadi inana moganedi wagaine, aga banae gina awaegau e ada nodi ina enoluga. Ada kadu anafaiweya, kai moganedi nuwanuwana ginana vavinena wagaidiya, aga badi ina awaegau e ada nodi ina enoluga.

⁴ Faina vavine keke wa yadi veimeya taudi vovodi faine, au moganedi wa yana veimeya vovodi faine. Ada kaduwe kaliva keke wa yana veimeya tauna vovona faine, au vavinena wa yadi veimeya moganedi vovona faine.

⁵ Kaliva keke vavinemiyavo wana awatadi ada keke nodi wana enoluga, kaduwe anafaiweya vevine keke moganemiyavo wana awatadi. Aku kai tamo tova nodi wana veimeya ada yami nuwanuwa seyana wagaine wana enoeya aku yami tova wana awaegena veoveola wagaine, wada iwakana. Aku veoveola anatova gina avaina aga amiselu wana itaveyabimi ke wana vebutu-vagila nodi wana daudau. Faina kai amiselu tova manamanawena wana enoenoea, aga kai Seitani ginaela gina aladibidibiyemi e ada udo-kavokavovo ananuwanuwa gina toyogina yami nuwanuwa wagaine, ada keke amifaiweya taumiyavo wana awatami.

⁶ Taidei yaku vona-nai ananuwanuwa imi nagi-nagimiyavo faimiya, ani keke vaita gada veimeya, aku aiyada gaawaegau ke tainei anafaiweya wanadewa.

⁷ Iya tautauboloku, ada ganuwanuwa vaita kaliva ke vevine moyaimi wada veanafaiweya Iyayeku. Aku Yaubada yana nuwadogeya amin-uwakabubu seyana seyana givelemi, e ada tu-

fomi yana lemeya wataubolo, aku tufomi yana lemeya wavenaginagi.

⁸ Aku imi keke naginagi, kadu imi sikwasikwa ke sibauwe, ani kadu wagaimiya ganavona. Kai Iya keke naginagiku anafaiweya imi keke wadanagi, aga ganuwanuwa ina gaitoma iwakana.

⁹ Aku kai amilutovona gina digaga-mowa vovo ananuwanuwa faina ada keke amifaiweya taumiyavo wana awatami, aga gilubodana au wananagi.[†] Kai vovo anakiluvaluva ananuwanuwa gina tubuga-mowa e ada vaita aiyabeyabela nuwainagemiya, aga keke iwakana. Nagi anawai iwaka-moena faimiya ayo taine wainai.

¹⁰ Aku kaduwe imi gavega wavenaginagi ani amiveimeya gana velemini. Ida keke tauku yaku vona aku Kauveya Tauna bonana. Imi vevine naginagi ani keke moganemiyavo wana viyoliliyedi.

¹¹ Aku kai tamo gaito moganena gina viyoliliyena, aga keke kaduwe mali kaliva nodi inanagi. Au taubolo gina miyamiya, o kai ginayewa-vagilena ke gina vebonaluga moganena nodi. Kaduwe imi kaliva, keke gida luboda vavinemiyavo wana viyoliliyedi.[†]

¹² Aku imi tovetumagana gavega vavinemiyavo o kai moganemiyavo keke ida vetumagana, ani wagaimiya gana ifufu. Ida keke vaita Kauveya yana veimeya anafaiweya gana vonaye, aku Iya tauku yaku nuwanuwa gana ifufuyena.

[†] **7:9** 1Tim 5:14 [†] **7:11** Mad 5:32, 19:9, Mak 10:11,12, Luk 16:18

Kai kaliva Keliso givetumaganena aku vavinena badi keke tovetumagana aku isefaga ke aimo moganedi nodi inamiya, aga keke gida luboda gina viyoliliyedi.

¹³ Kaduwe anafaiweya, kai vavine Keliso ivetumaganena aku moganedi keke gida vetumagane aku moganedi gisefaga nodi inamiya, aga keke gida luboda vavine-dina moganedi ina viyoliliye.

¹⁴ Faina kai gavavavine moganedi keke gida vetumagana Keliso wagaine aku vavinena badi tovetumagana, aga moganedi-nai vavinena yadi vetumagana wagaine banae ani tabutabuna Yaubada matane. Kaduwe anafaiweya kai gavavavine keke Keliso ida vetumagane aku moganedi tovetumagana, aga vavinena-dina moganedi yana vetumagana wagaine badi tabutabudi Yaubada matane. Taidei anafaiweya kaduwe natudiyavo badi tabutabudiyavo Yaubada matane. Kai tama ke ina keke tabutabudi Banae matane, aga natudiyavo kaduwe keke yegayegadiyavo Yaubada matane.

¹⁵ E aku kai kaliva keke gida vetumagana Keliso wagaine ani ginuwanuwa vaita vavinena gina viyoliliyedi, o kai vavine keke ida vetumagana ani inuwanuwa vaita moganedi ina viyoliliyena, aga awaawaegedi. Au yadi nuwanuwa anafaiweya ina vegugaiyena. Kai taide gida yegemona, aga kaliva o kai vavine tovetumagana ani au ida awaegau ke adifaiweya ina miyadaka. Keke tamo awata nagi faina gida yogodi. Faina Yaubada nuwanuwana ide yana yooyavo ani kukuyeya ke nuwaniwaloveya kana miyamiya.[†]

[†] 7:15 Lom 14:19

16 Imi vavine, kai wagaimiya moganemi Yaubada yana kibababala gina nuwagana kai keke? Keke wada alamane.† Ada o kaliva anafaiweya, kai o wagainiya vavine Yaubada yana kibababala ina nuwagana kai keke? Keke uda alamane.

Yada miya anawai-nai Yaubada giveleda ani kana miyamiya anafaiweya.

17 Kadu ganavona. Imi tovetumagana, gavamiya anawai bademowa Yaubada giveleda, au kana vemwamwala faine. E ada yada miya anawai-nai kamiyamiya wagaine tova-nai Bana givenuwadadaneda ke kaluku yana yoo wagaidiya, e ani taine anafaiweya kana miyamiya.† Taidei anafaiweya ekalesiya moyaidi wagaidiya gavevewala.

18 E ada kai kwana Isileli bademowa vovona bubuna bwatana itomogoloina Yaubada yana veyavo anawai anaiyaiyaya-nai anafaiweya† aku Yaubada gidouwena ke yana yoo wagaidiya giluku, ani keke gina galuvaluva ayo anabwaya-nai gina sewavuye. Ada kai gavakaliva vovona bubuna bwatana keke ida tomogoloi aku Yaubada gidouwena ke giluku yana yoo wagaidiya, ani keke gida luboda kaliva-nai vovona bubuna bwatana ina tomogoloi.

19 Faina kai vovo bubuna bwatana anatomogolota wavaina o kai keke, ani wada gaitoma-kavokavovo. Aku gaitoma

† 7:16 1Pi 3:1-2 † 7:17 1Kol 7:24 † 7:18 Eba 17:10-27, Iyeg 12:48, Luk 1:59 ke anaailabama adiebakivemala

lakaina velemoena, ani Yaubada yana veimeya kana matawalewalevedi.†

20 Imi seyana seyana tova-nai Yaubada givenuwadadanemi ke wavetumagana, ani nagona gavamiya anawai wagaine wamiyami? Yami miya anawai-nai keke wana dibusoyoge aku aiyada wana miyamiya wagaine.

21 Kai tufomi wavetogugai yogoyogona kaliva seyana wagaine aku Yaubada givenuwadadanemi ke wavetumagana, aga keke wana venuwanauna bana faine. Aku kai amitoveimeya-nai gina etoyavumi, aga wana miyasegena aku yavuyavumiyavo wananau.

22 Faina imi gavega togugai yogoyogomi aku Kauveya givenuwadadanemi ke wavetumagana wagaine, ani velemoena Kauveya bademowa gi-etoyavumi Seitani yana veimeya ke dewa koyona ananuwanuwa wagaidiya. Ada tova malinai wavetogugai yogoyogona kaliva wagaidiya nonogana imi Kauveya yana kaliva yavuyavumiyavo. Aku imi gavega keke togugai yogoyogomi kaliva wagaidiya aku Keliso givenuwadadanemi ke wavetumaganena, ani Banae wagaine wavetogugai yogoyogona.

23 Yaubada bademowa fata lakai-vagina** gisena ke gitutuveobumi e ada moyaimi yana yooyavo. Tainei faina keke wana vetogugai yogoyogona babi anakalivayavo yadi nuwanuwa kavokavovo wagaidiya ke ina veiveimeyemi.

† 7:19 Gal 5:6 ** 7:23 Fata-nai lakai-vagina ani Yeisu Keliso giawaegena ke gialika moyaida faideya.

24 E ada tubuiyakuweyavo, imi seyana seyana tova-nai Yaubada givenuwadadanemi ke wavetumagana, ani nagona gavamiya anawai wagaine wamiyami? Keke wai-nai wana dibusoyoge aku aiyada wana miyamiya wagaine Yaubada nodi.

Vewala badi tautaubolodiyavo kadu sikwasikwayavo faidiya.

25 E aku yami toolidadana vevine mataboladi faidiya, ani Kauveya keke tamo gava veimeya gida veleku badi faidiya. Aku Banae yana nuwakalikali wagaikuya faina, malinai Iya seyana yana kalivayavo wa akuvetumagana. E ada tauku yaku nuwanuwa gana ifufuyena.

26 Vita-dina ide tovetumagana kalulutovonidi faina, Iya ganuwanuwa vaita kai kaliva nagingina o kai keke, kai aimo gimiyamiya anafaiweya ada gina naunau, au wada iwakana.

27 Kai kaliva bademowa ginagi, aga nagi anaveimeya wagaine gimiyamiya e ada keke wai ginalele ayo vavine-nai gina viyoliliye. Ada kai kaliva keke gidanagi, aga keke wai ginalele ke ginanagi.

28 Aku kai gavalakaliva ginanagi ani wada iwakana, keke gidadewa koyona. Ada kadu anafaiweya kai gavavavine keke nagingina aku ginanagi ani wada iwakana, keke gidadewa koyona. E aku kaliva ke vevine nagingidiyavo ani vita tulina tulina ina nuwagana yadi yauvivila wagaidiya, e ada gagaluvaluva gana lememe ke miya-nai anafaiweya wana velovogena.

29 Tubuiyakuweyavo, taidei yaku vona ani ananuwanuwa taide anafaiweya. Ida

tova-nai givemaufu, e ada tova taidei ke gina naunau ani keke gida luboda yada miya babiya ananuwanuwa nuwada gina vaivai, keke. Badi kaliva-dina keke naginagidiyavo ani taudiyavo iawaawaegedi velemonoena Kauveya yana nuwanuwa wagaine, ada badi kaliva naginagidiyavo ani kadu anafaiweya taudiyavo ida awaawaegedi Kauveya wagaine. Keke yadi nuwanuwa ida sesei toyogina vavinediyavo gaga wagaidiya.

³⁰ Badi gavega itagi donadonau, kadu badi ivemwamwala lakaina, ada badi giba ikimokimone, ani gilubodana yadi tagiya o kai yadi vemwamwala o kai giba anakimone keke nuwadi gina vaivai.

³¹ Kaduwe imi babi taidei anagaitoma wave-faisewadi ani keke nuwami wana sevelavelalaidi taine gaitoma-dina gagana wagaidiya. Faina babi taidei anafaiweya malinai gimiyamiya ani gina avovolina.[†]

³² Keke nuwanuwaku tova moyaina yami nuwanuwa gina nauna yami miya anavita tulina tulina wagaidiya, aku yami nuwanuwa wagaine wana miyamiya yavuyavumiyavo. Keke wana venuwanauna lakaina.[†] Kaliva tautaubolona ani Kauveya yana gugai faine gina venuwanauna, faina nuwanuwana Kauveya gina kivemwamwalina.

³³ Aku kaliva naginagina ani banae givenuwanaunau babi taidei anagaitoma faidiya, gavaiyamu vavinena gina kivemwamwalidi faina.

[†] 7:31 1Iyo 2:17 [†] 7:32 Mad 6:25, Luk 10:41

³⁴ E ada gaitoma-dina iluwei nuwana isigadagadana. Tova seyana gina nuwanuwa Yaubada faine, aku tova seyana gina nuwanuwa vavinena faidiya. Ada kadu anafaiweya vevine-dina tautaubolodi o kai akedudiyavo. Tova moyaina Kauveya yana gaitomayavo faidiya ina venuwanaunau, faina badi nuwanuwadi vovodi ke aluwaluwadi wagaidiya tabutabudiyavo ina miyamiya Yaubada matane. Aku vevine naginagidiyavo ani ivenuwanaunau babi taidei anagaitoma faidiya, gavaiyamu moganediyaavo ina kivemwamwalidi.

³⁵ Taidei yaku vona-nai gaifufuyena ani yami leme faina. Ida keke vaita nagi anaawata gada sesei ayo wana muliye, aku nuwanuwaku gana lememe ke wanamiya wai tunutunugina wagaine, e ada taumiyavo wana awaawaegemi vele-moena Kauveya wagaine ada Banae anakaibemowa nuwami gina vaina.

³⁶ Aku kai tamo kaliva ani bade vavine iawavunavunana tauna faine aku adiselu aimo keke idanagi ada vavine-nai bademo anafaiweya ginanagi, ada kai bana nuwainagene gimatauta kai keke anafata tauna gina awata ada banae tauna nuwanuwana lakaina ginanagi faina, aga ida iwakana yana nuwanuwa gina muliyena ada adiselu inanagi. Wada keke dewa koyona.

³⁷ Aku kai tamo gaito yana nuwanuwa toyogina aseasene vaita bana vavine-nai iawavunavunana keke gidanagi ada banae anafata-mowa tauna gina awatana, ada kaliva anafaiweya kai keke gidanagi, bana gigugai iwakana.

³⁸ E ada kaliva-nai ginagina, gigugai iwakana.

Aku kaliva-nai keke gidanagi, gigugai iwakamoena.**

³⁹ Aku vavine naginagidi ani moganedi aimo wayawaina gimiyamiya wagaine, badi nagi anaveimeya dibune aimo imiyamiya ada keke wa adiawaega moganedi ina viyoliliye. Aku kai moganedi gina alika aga badi yavuyavudi nagi anaveimeya moganedi nagona wagaine-deya, e ada gaito nuwanuwadi ina nagina, wada iwakana. Aku kaliva-nai ani tovetumagana gagana nodi inanagi.†

⁴⁰ Aku ganuwanuwayena vaita kai sikwa-dina keke inanagi-vagila aku au ina miyamiya anafaiweya, ina vemwamwala-mowa ayo sikwa-dina badi inagi-vagila. Ada gavetumagana Yaubada Aluwaluwana ginagonagoyeku ke anafaiweya gavonavona.

8

*Keke gida luboda Keliso anavetumagana
kana vetutamwai yaubada fwayafwaya
adivetumagana nodi.*

¹ Tubuiyakuweyavo, yami toolidadana seyana ani kadu gana fatana, tainei kevakeva ivevebolavoiyedi yaubada fwayafwaya wagaidiya faina. Kaalamanena vaita moyaida wa yada alamana taidei gaitoma-nai faine. Aku kai ide nuwainagedeya kavona, “Iya kaliva alaalamaniku,” aga tainei nuwanuwa-nai

** **7:38** Maita taide faine vona Giliki wagaine ani kadu kivila tulina gimiyamiya, anafaiweya kaliva seyana kai natuna vavine gida awavunavunana ke gidanagi faina o kai keke. † **7:39** 2Kol 6:14

gina nagoyeda ke taudeyavo kana kikilakaida. Ada gaito taide nuwanuwa-nai gina leme? Keke tamo. Aku kai tubuiyadeyavo kanuwakabubuyedi, aga kana lemelemedi ada kanavona asevaturi e ada ina mididi toyogina.

² Kai tamo gaito nuwainagene givona, “Iya alamaniku,” aga gavana gilubodana gina alamanena ani aimo keke gida alamanene.

³ Aku gaito ginuwakabubuyena Yaubada ani bana faine Yaubada givonaga, “Banae ani Iya yaku kaliva, ada banae gaalamanena.” †

⁴ E aku tayuwe kevakeva-dina ivevebolavoyedi yaubada fwayafwaya wagaidiya, ani gavaiyamu kadadewa faidiya? Tayuwe kevakeva-nai kada kanina? Ide kaalamanena yaubada fwayafwaya ani keke velemonoena Yaubada. Faina Yaubada anakaibe-mowa velemonoena, ada keke tamo kaduwe.

⁵ Aku kaliva moyaidi ivetumagana ke ivona, “Wada yaubada moyaidi ke kauveya moyaidi imiyamiya gabameya kaduwe babiya.” Taidei vona velemonoena

⁶ aku ideyavo ani kaalamanena Yaubada seya-moena, Banae Tamada. Bana gaitoma matatabuna vuvudi, ada Banae faine ide kamiyamiya.† Ada kaduwe kaalamanena vaita Kauveya anakaibe-mowa ani Yeisu Keliso, ada Banae wagaine Yaubada gaitoma matatabuna gibubudi,† ada Banae wagaine ide kamiyamiya.

⁷ Aku taidei gaitoma-dina faidiya ani kaliva tufodi keke wayadi alamana, e ada yadi vetumagana aimo keke toyogina. Faina

† 8:3 Iyo 14:23 † 8:6 Efes 4:6 † 8:6 Iyo 1:3

tova tuwaina malamala bademowa gavaiyei wagaidiya ada gielai malinai, ani badiyavo wa yadi matauta yaubada fwayafwaya wagaidiya ioduodu, ada tova ke tova kevakeva-dina ivevebolavoiyedi wagaidiya ani ikanikanidi. E ada malinai inuwanuwa vaita kai vebolavoi kevakevana ina kanina, aga nuwafoudiya ina lutovonina vaita bwanebwanebani ada Yaubada gina itavenuvenuwadadani vaita badi wa yadi koyona.

⁸ Aku gava aa o kai gava kevakeva kana kanina, ani keke faine Yaubada gida awaveiwakaneda. Kai aa seyana keke kanakani, aga Yaubada keke gida nuwenuweda vaita ide kakoyona. Ada kai taine aa-nai kana kanina, aga Yaubada keke gida nuwenuweda vaita ide yegayegadeyavo.

⁹ E ada bademowa waalamanena vaita kevakeva-dina ivebolavoiyedi yaubada fwayafwaya wagaidiya, ani adikani faina keke tamo awata gida miyami, e ada amifaiweya wanakani. Aku wana itaveyabimi aenanai amiawaega wana vegugaiyena ke kevakeva-nai wana kanina, aku badi kaliya-dina aimo keke ida vetumagana ida kanina ani vaita kabala lakaina wasena yadi wai wagaine e ada ina madubeu wagaine.

¹⁰ Imi waalamane-yabuna gaitoma-dina faidiya ani kai wanaluku yaubada fwayafwaya anamanuwa anaebaoduodu wagaine wana kanikani, aku tovetumagana seyana gina itami, banae ani kevakeva-nai anakani faina nuwafoune gina lutovonina ada ginavona, "Tainei kevakeva-nai anakani

awaawatana, aku taumada tubuiyakuweyavo ikanikani faina, Iya kaduwe ganakani.” Gavaiyamu, kai wanuwanuwa vaita yami kani wagaine tubuiyami yana vetumagana wana kivetubugina? Keke, keke-mowa.

¹¹ Aku imi yami alamana-nai wagaine, banae kaliva-nai yana vetumagana keke toyogina ani wakivekoyona, banae tubuiyami-nai ani Keliso gialika faine.[†]

¹² Tubuiyamiyavo yadi vetumagana keke toyogina ani kai taide anafaiweya wanadewa matadiya ke inakani, aga adilutovona nuwafoudiya ani vaita taudiyavo idewa koyona, e ada taide yami dewa-nai wagaine wakoyona wagaidiya. Ada keke badiyavo gagana wagaidiya wada koyona aku Keliso wagaine wakoyona,[†] faina badi Keliso yana kalivayavo.

¹³ Taidei faina kai gava aa o kai gava kevakeva gana kanina e ada tovetumagana gina itayaudi wagaikuya ada banae kaduwe gina kanina, aga tauku gana awataku. Keke seyana tova kaduwe aa-nai o kai kevakeva-nai ganakani aenanai tubuiyaku gana vebeuna ada gina koyona.[†]

9

Paulo Yaubada yana faisewa wagaine gi-faifaisewa meKolinita faidiya aku analeme keke nuwanuwana.

¹ Yaku dewa ani gavaiyamu imi meKolinita waitaita? Kai wanuwanuwa vaita Iya keke awaawaegeku? Kai wanuwanuwa vaita Iya keke

[†] **8:11** Lom 14:13-17, 1Kol 8:8 [†] **8:12** Mad 25:45 [†] **8:13** Lom 14:21

afositolo velemonoena? Kai wanuwanuwa vaita Iya keke yada Kauveya Yeisu Keliso tauku matakuya gadaita, aiyo?† Kauveya yana gugai gagugugaiyena faina, imi Banae wagaine wavetumagana, e ada imiyavo ani Iya yaku gugai guwana.

² Kaliva tufodi inuwanuwa vaita Iya keke afositolo nonogana imi wagaimiya ani Iya afositolo, faina yaku gugai wagaine imi wavetonogala. Taidei giawavelemonoena vaita Iya Kauveya yana afositolo seyana.†

³ Badi gavega ivona venuvenuwadadaneku vaita Iya keke afositolo ani tauku faikuya gaawabababala wagaidiya taide anafaiweya.

⁴ Ime** Yaubada yana togugaiyavo ani gavaiyamu, kai keke amalauboda amaga ke amagufa ana nuwanuwagadi yama faisewa imi tovetumagana wagaimiya faina?

⁵ Ada afositolo velugadiyavo ada yada Kauveya Yeisu tainavo ke kaduwe Pita, ani vavinediyavo badi tovetumagana ikwayabudi nodi ibalabala walilivuga Kauveya yana faisewa wagaine, ada imi waawaveiwakanena. Aku ime faimeya ani kai adanagi, aga gavaiyamu wada nuwanuwa, ime keke amalauboda ke vavinemeyavo nodi ana nauna faisewa-nai wagaine?

⁶ Afositolo velugadiyavo adileme inuwanuwagadi tovetumagana wagaidiya, aku imi gavaiyamu wanuwanuwa? Vaita Banabasi ke Iyayeku amaiselu gagana amalauboda

† 9:1 Gug 26:16 † 9:2 2Kol 3:2-3 ** 9:4 Paulo yana vona 'ime' ani givonavona tauna ke Banabasi faidiya.

taumeyavo yama toyogineya amaleme ana nuwanuwagadi? Keke.

⁷ Gavaiyamu, tolugaviya taudiyavo adiga ke adinuya ikimokimoned i yadi miya faina? Keke. Ada kadu tonibakula wana nuwenuwena. Kai wamo waifeina gina bakulina, aga bavagu wagaine banae maita aa-nai gina kanina kai keke? Ika, analauboda gina kanina. Kadu sifi adi-toitaveyabina faine. Kai sifi giitaitaveyabidi aga sifi-dina susudi tufona ginayuna? Ika, analauboda susudi ginayuna.

⁸ Taidei yaku vona-nai ani keke kaliva yadi nuwanuwa gagana wagaine-deya, aku aiyada Yaubada yana veimeya wagaine kaduwe taidei anafaiweya givona.

⁹ Faina Yaubada yana veimeya Mosese givelena ani taidei anafaiweya givona, “Bulumakau witi givagakolukoluna ani keke gida luboda muduna wana yogoboda bulava wagaine. Au wana awaege gina kanikani.” † Ina velemono ana ani keke bulumakau gagana faidiya Yaubada gida nuwanuwa,

¹⁰ aku kaduwe ide kaliva faideya givonavona. Ika, faideya givetokilumina, e ada badi babi anatotugaga ada badi witi anatosilakalakata ani wa yadi nuwavetumagana ina faifaisewa, faina adilauboda ke adivutuga aa faine ina nuwagana.

¹¹ Kaduwe anafaiweya, kai ime Yaubada yana vona abakulina aluwaluwamiya, ani gavaiyamu wanuwanuwa? Kai ada veoveolemi maita gaitoma moyaidi faidiya yama miyami faine?†

† 9:9 2Vei 25:4, 1Tim 5:18 † 9:11 Lom 15:27

12 Kaliva tufodi wanuwenuwedi vaita adilauboda wada lemelemedi, ada ina iwakana. Aku kai badi taidei anafaiweya lakaina walemelemedi, aga gavaiyamu imeyavo? Kai keke ime amalauboda ada wana lemema lakai-moena, aiyo? Ime amalauboda ke amaleme ana nuwagana yama faisewa faina, aku keke ada awaega ke wana lemema, faina keke nuwanuwama gaito seyana ginavona, "Paulo ke tubuiyanavo nodi laumamala wagaine yadi seba isesena aku nuwanuwadi aa ke giba ina vaivaidi, e ada yadi laumamala Keliso anavaleya iwakana faine ani kana dibusoyogena."

13 Gavaiyamu, kai keke wada alamane badi ifaifaisewa manuwa tabu wagaine, ani adiga inuwanuwagadi manuwa tabu-nai wagaine? Ada kaduwe badi ifaifaisewa vebolavoi anadidiga wagaine, ani vebolavoi kevakevana kaliva ivele-kavovoyedi ani wagaidiya adivutuga ivaivaidi.†

14 Kaduwe anafaiweya, yada Kauveya Yeisu giveimeya ke badi ifaifaisewa valeya iwakana anakive akwalelega wagaine, ani adilauboda taidei valeya-nai iwakana wagaine adileme yadi miya faina ida vaivaina.†

15 Kai akuleme gada nuwanuwagana yaku faisewa valeya iwakana wagaine faina, aga ina akulauboda. Aku taide akulauboda-nai, ani tuwaina ada gielai malinai Iya keke gada awaega ke leme gana nuwaga. Ada kaduwe taidei letanai gavetokilumina, ani keke vaita nuwami gada kanikani ayo wana lemeku, keke-mowa. Valeya iwakana galumamalena wagaimiya aku

† 9:13 2Vei 18:1-3 † 9:14 Mad 10:10, Luk 10:7, Gal 6:6

keke tamo laufata gadavai nimamiya, ada taidei faina gagakaikai. Ada keke nuwanuwaku gavega ina lemelemeku yaku faisewa-nai faine e ada taidei yaku gakaikai vuvuna-nai gina vaiyavulena. Auwe kai gana alika, wada keke gaitoma lakaina, aku au keke nuwanuwaku leme gada nuwaga e ada yaku gakaikai-nai gida vegaitomakavokavovo.

¹⁶ Yaubada Tauna taidei gugai-nai nimakuya gisena, e ada keke tamo yaku vuvu ayo gana gakaikai gugai-nai faine. Kai keke gada gugai valeya iwakana analaumamala wagaine, aga Iya nuwakalikaliku, vita lakai-moena gana nuwagana.

¹⁷ Kai Iya tauku yaku nuwanuwa wagaine gugai taidei gada venuwadadanena ada gada vaina, aga analauboda fataku iwakana gada nuwanuwagana. Aku ida keke tauku yaku nuwenuweya gugai taidei gadavai, aku Yaubada Banae givetumaganeku ke taidei gugai-nai nimakuya gisena, e ada ida akulauboda gana gugaiyena.

¹⁸ E ada gavalaufata iwakana ganavai taidei gugai-nai faine? Iya fataku ani taide anafaiweya. Keliso anavaleya iwakana galulumamalna wagaine, keke tovanenega wagaidiya leme gada veoveoladadana faine, e ada wagaidiya keke wa fatana. Leme-nai ani akulauboda gada nuwagana yaku faisewa faine, aku keke nuwanuwaku. Taidei gikivemwamwaliku lakaina, ada idogame-nai akulaufata.

Paulo nuwanuwana lakaina yoo tulina tulina moyaidi gina nagoyedi Keliso wagaine.

¹⁹ Iya keke tamo kaliva yana togugai, aku yavuyavuku gamiyamiya. Aku kaliva moyaidi wagaidiya tauku gaseku yadi togugai, e ada meyameyaganina bonaku ina nogalina ke taudiyavo ina awaege-vagaidi Keliso wagaine.

²⁰ MeIsileli ani Mosese yana veimeya dibune imiyamiya, veimeya-nai Yaubada give-lena Mosese, e ada tova-nai badi wagaidiya gamiyamiya ani adigiduwa gavemoimoinedi. Iya keke Mosese yana veimeya dibune gada miyami nonogana gadewadewa vaita veimeya-nai dibune gada miyamiya, e ada meyameyaganina bonaku ina nogalina ke taudiyavo ina awaege-vagaidi Keliso wagaine.

²¹ Kaduwe anafaiweya badi keke meIsileli ada Mosese yana veimeya keke ida alamane, ani tova-nai badi wagaidiya gamiyamiya, adigiduwa gavemoimoinedi ke gadewadewa vaita Iya keke Mosese yana veimeya dibune gada miyamiya. E ada meyameyaganina bonaku ina nogalina ke taudiyavo ina awaege-vagaidi Keliso wagaine. Aku Yaubada yana veimeya keke gada yaweli, aku velemoena ani Keliso yana veimeya dibune gamiyamiya.

²² Kaduwe tova-nai gamiyamiya badi wagaidiya gavega yadi vetumagana keke toyogina, aga gamiyamiya badi anafaiweya e ada meyameyaganina bonaku ina nogalina ke taudiyavo ina awaege-vagaidi Keliso wagaine. Yoo yoo tulina tulina moyaidi faidiya, ani yaku dewa gaveimeyena ke adigiduwa gana muliyedi, ada gavaiyamu yadi miya, ani anafaiweya Iya gana miyamiya, e ada meyameyaganina gavawai

wagaina tufodi gana nagoyedi ke inaelai Keliso wagaine ke adikibababala ina nuwagana.

²³ Taidei yaku dewa-dina moyaidi, ani gaveg-ugaiyedi valeya iwakana anaakwalelega faina, e ada imeyavo ke imi valeyana anatovetumagana nodi aigaigabuya valeya-nai anaiwakana kana nuwagana.

²⁴ Waitana, vemadu wagaine tomadu moyaidi imadumadu, aku wagaidiya-deya seya-moena wai gina nagona ada fata iwakana gina vaina. E ada tomadu ivedivediwe toyogina anafaiweya, kadu imi wana vedivediwe toyogina ke fata iwakana wana nuwagana.[†]

²⁵ Tomadu seyana seyana yana miya wagaine, gaitoma tulina tulina wagaidiya tauna giawaawatana, anafaiweya yanada ke yana kani ada yana madu luvaluva. Taidei anafaiweya idewadewa e ada vemadu anatoveya ina vetowainagona ke fata iwakana ina vaina, aku taine fata-nai ani avaavaina. Aku ide fatada-nai faine kadamadamu ani miyamiyani-vagaina.[†]

²⁶ Yaku awaega valeya iwakana anafaisewa faine, ani keke anafaiweya tovmadu seyana gimadamadu aku keke wa ananunu. Kadu ebaita fwaiki wagaine, Iya keke anafaiweya tofwaiki nimana gida veyavegi-kavokavovo mwatugu wagaine, keke.

²⁷ Aku tauku gaitaveyabi-dewedeweku, yaku nuwanuwa gasedewedewedi ke gaveiveimeyedi, ada vovoku wa ananuwanuwa nodi gaawaawata-moena. Keke analauboda Iya Yaubada yana valeya iwakana galulumamalena aku kadu

[†] 9:24 Fip 3:14 [†] 9:25 Iyem 1:12

gana dewadewa koyona, e ada fata iwakana aimo gada nuwagana ani gana kibamuina yaku beu koyona wagaine faine.

10

Taudeyavo kana itaveyabida ada keke koyona wagaine kanabe anafaiweya meIsileli ibeu.

¹ Tubuiyakuweyavo, tamadeyavo nagona yadi dewa kana nuwanuwayedi. Tova tuwai-moena Itipita wagaine-deya iyegemona, ada iwaliwali fafali kavovona wagaine aku Yaubada yana buibui dibune inaunau e ada wai givewaledi,[†] ada kaduwe Leyaga Yabeyabelina idamanina.**

² Ada ivebutu ivetomuliya vaguvagu Mosese wagaine, e ada yadina buibui-nai dibune ada Leyaga-nai nefanine ani anafaiweya vaita ibabitaiso Mosese wagaine.

³ Ada fafali kavovona-nai wagaine iwaliwali aku aa anayegana 'mana' Yaubada giveleveledi, ada matatabudi aa-nai wagaine ikani.[†]

⁴ Ada matatabudi ani gufa Yaubada giveledi iyuyuga, ani gufa-nai Kabala lakaina wagaine gikiveyegemoni giyegesousoulena.** Kabala-nai

[†] **10:1** Iyeg 13:21-22 ** **10:1** Tova-nai meItipita meIsileli iven-evenegadi ani Yaubada gigai Leyaga Yabeyabelina giawaina ada meIsileli matatabu-moedi idamana babi ayayana wagaine. (Iyeg 14:22-29) [†] **10:3** Iyeg 16:4-35 ** **10:4** Tova iluwei anafaiweya ivona vaita Yaubada gufa gigai gimadu kabala wagaine-deya meIsileli inayuga faina. (Iyeg 17:1-7, Naba 20:1-3)

ani Keliso Tauna, Banae gikwayakwayabudi.**

⁵ E, Yaubada giitaveyabidi ke ginagoyedi nonogana tufona moyaidi yadi dewa koyodi faidiya Yaubada keke gida vemwamwala wagaidiya. Taidei faina giawaegena ke ivealialika, ada vovodi iyavulenuwedi fafali kavovona wagaine.†

⁶ E ada tubuiyakuweyavo, taidei yadi dewa-dina koyodi faidiya adimatavuloga inuwagana, ani wada yada ebaita e ada alamana kana vaina vaita gavadi gavadi dewa koyodi, ani keke kada italuvadigedi e ada biyavo-dina anafaiweya kadadewa.

⁷ Idayavo ani keke gida lubodada yaubada fwayafwaya wagaidiya kana oduodu anafaiweya tufodi idewa. Taidei yadi dewa-dina faidiya ani Buki Tabu givona, “MeIsileli ivetoga ikani ke iyuga, ada imididi yadi yaubada fwayafwaya itavoli balawalilivugina ada veneganega koyomoena iveneganegayena.” †

⁸ Keke gida luboda vovo anaawaega-kavokavovo anadewa kana dewadewaye anafaiweya badi tufodi tuwaina idewayena. Yadi dewa-nai faina, Yaubada givematavulogidi ke yadayada seya-moena wagaine kaliva ke vevine moyai-vagaidi ialika, adiyoo tuweniti teli tausani (23,000). †

⁹ Kaduwe keke gida luboda Keliso yana atu-

** **10:4** Kabala-nai wagaine gufa giyegemona ada aa-nai Yaubada givelveledi ani iveebaita yana avetavetala gufa ada aa Keliso wagaine-deya, Bana beledi-nai yawai givelavelau ada gufa-nai yawai givelavelau. (Iyo 4:4, 6:30-35) † **10:5** Naba 14:20-35, Ibel 3:17 † **10:7** Iyeg 32:1-6 † **10:8** Naba 25:1-5

vefaila kana galuvaluva anafaiweya badi tufodi tuwaina idewa. Yadi dewa-nai faina, mota koyomoedi iyegemona ada iyovadi ke ialika.†

¹⁰ Kaduwe keke kada gavoluvoluye anafaiweya badi Yaubada igavoluvoluyena. Tufona moyaidi idewa anafaiweya, e ada Yaubada yana anelose bana toluyavula giimilina ke giluyavuledi.†

¹¹ Tayuwe gaitoma-dina tova tuwai-moena wagaine iyegemona tamadeyavo nagona wagaidiya, ani iveebaita kaliva faidiya. Ada valeyadi taidei ivetokilumina Buki Tabu wagaine ani ide adakivetunu faine,† ide kaliva-dana kamiyamiya tutuya matatabuna adiebalauyabu wagaine.

¹² Taidei faina kai seyana gaito gina vonaga, “Iya wa yaku vetumagana gamidimididi toyogina,” aga tainei kaliva-nai yana dewa gida itaveyabina aenanai ginabeu koyona wagaine.

¹³ Aladibidibi tulina tulina wanuwanuwagadi, ani anafaiweya aladibidibi-dina kaliva ke vevine moyai-moedi wagaidiya iyegeyegemona, keke anatulina. Aku Yaubada wa anavetumagana, e ada adafaiweya kana tunuvala wagaine. E ada gava aladibidibi gina yegemona wagaimiya, aga keke Yaubada gida awaege-yo gina toyogitagonemi, keke. Aku aiyada tova-nai gina yegemona wagaimiya, aga kaduwe Yaubada ota anawai gina vewalemi ke aladibidibinai wanaota-yabuyabuna, e ada amifaiweya wana atuvefailena.

Keke sakalameni kana vaivai aku kaduwe

† 10:9 Naba 21:4-9 † 10:10 Naba 14:28-37 † 10:11 Lom 15:4

aluwaluwa koyona anavemoimoina anakanibutu wagaine kanakani.

¹⁴ E ada tubuiya aseasekuweyavo, yaubada fwayafwaya adioduodu ani wanaota wagainedeya. Keke maita wana vemoimoinedi.

¹⁵ Imi wanuwanuwa dewadewa, e ada wana nuwanuwa yaku ifufu faine ke taumiyavo faimiya wana venuwadadanena kai vona velemoena o keke.

¹⁶ Waitana, sakalameni anayaudi wagaine gufa wa veina faina kavona vesiule, ada kayuga wagaine au ina kaveseyana Keliso dayagina wagaine. Ada beledi-nai kakiineinena ke kakanina, au ina kaveseyana Keliso vovona wagaine.

¹⁷ Beledi ani seya-moena, ada ide yoo tulina tulina nonogana moyaida kakanikani beledi-nai seya-moena wagaine, e ada ida giveebaita ani moyaida nodi ani vovoda seya-moena.†

¹⁸ Kaduwe, meIsileli kana nuwanuwayedi. Yadi kevakeva o kai aa ivevebolavoiyedi Yaubada yana vebolavoi anadidiga wagaine, e ani aditufu ikanikanina, ada taidei wagaine ikani aigaigabu ke iveseyana Yaubada nodi.†

¹⁹ Gavaiyamu wanuwanuwa yaku vona taidei faina? Kai gavona vaita yaubada fwayafwaya ada kevakeva ivevebolavoiyedi wagaidiya ani gaitoma lakaina? Keke-mowa.

²⁰ E aku gaitoma-dina ivevebolavoiyedi, ani wada keke Yaubada wagaine aku aiyada aluwaluwa koyodi wagaidiya. E ada badiyavo idewadewa anafaiweya, ani keke nuwanuwaku

† **10:17** Mad 26:26-28, Mak 14:22-24, Luk 22:19-20, Lom 12:5

† **10:18** Vei 10:12-15, 2Vei 18:1-4

badi nodi wana luluveya. Keke maita iwakana wana vevetubuiyana aluwaluwa koyodiyavo nodi ada wana veseyana.

²¹ Keke maita amiawaega Kauveya yana vei wanayuge ayo wanana aluwaluwa koyodi yadi vei wanayuge. Keke maita amiawaega aa-nai seseliyena Kauveya wagaine wanakani yana teibeli wagaine ayo wanana wanakani aa-nai seseliyena aluwaluwa koyodi wagaidiya yadi teibeli wagaine.[†]

²² Wana nogalina, keke Kauveya anavetumagana ke aluwaluwa koyodi adivetumagana ani nodi wana lomwalomwani, aenanai Kauveya nuwana wana kivekoyona. Evona wanuwanuwa vaita imi totoyogina ayo Banae?

Yada yauvivila yadayada seyana seyana wagaidiya Yaubada anayegana kana kikilakaina.

²³ Aku tufomi wavonavona, “Idadi bademowa yaku koyona Yeisu givenuwaegena e ada yavuyavuku. Ada gavana nuwanuwaku gana gugaiyena, au akufaiweya gana gugaiyena.” Aku gana vonemi, “Dewa moyaina ani keke iwakana matatabuna, ada kaduwe yada vetumagana keke gina kivetubugi.”

²⁴ Keke taudeyavo gagana yada iwakana faina kanalele, aku aiyada badi imiyamiya lilivadeya yadi iwakana faina kana lelele.

²⁵ E ada kai gava kevakeva maketi wagaine nuwanuwami wana kimonena, aga keke wana tolidadana wanavona, “Gavaiyamu, ida kevakeva ivebolavoiyena yaubada

[†] **10:21** 2Kol 6:15-16

fwayafwaya wagaidiya o kai keke?” Keke taidei anafaiweya wana tolidadana e ada nuwafoumi wana kiveuloloni. Aku au wana kimone wanakani.

²⁶ Faina “babi matatabuna ada kaduwe gaitoma matatabuna babiya imiyamiya ani Yaubada Bana toinavuvuna.” †

²⁷ Aku kai seyana kaliva banae keke Yeisu anatovetumagana, ani gina nuwabiyemi nodi wanakani ada nuwanuwami nodi wanana, aga au nodi wanana. Wanana ke gava aa o kai gava kevakeva matamiya inasena, wada wanakani. Keke wana tolidadana kai ivebolavoiyena yaubada fwayafwaya wagaine o kai keke. Keke taidei anafaiweya wana tolidadana e ada nuwafoumi wana kiveuloloni.

²⁸ Aku kai tamo gaito gina matawemi ginavona, “Taide kevakeva-nai ani ivebolavoiyena yaubada fwayafwaya wagaidiya,” aga keke wanakani. Kai wana kanina aga keke iwakana, faina kaliva-nai givonemi ani kai ginuwanuwa vaita kevakeva-nai ivebolavoiyena ani awaawatana, e ada imi yami kani wagaine banae ginuwanuwa vaita wakoyona Yaubada matane. E ada banae nuwafouna wana kiveulolonina.

²⁹ Imi keke wada nuwanuwa vaita kevakeva-nai anakani Yaubada matane ani koyona, aku tubuiyami ginuwanuwa ani wada koyona Yaubada matane. E ada tubuiyami faine wada nuwanuwa. Keke iwakana bana nuwafoune gina nuwanuwa vaita imi wakoyona e ada gina aseuloulolo imi faimiya. Tubuiyamiyavo yadi iwakana faina taide anafaiweya yaku ifufu. Aku bademowa gavonemi anafaiweya, kai ide

† 10:26 Sam 24:1

taudeyavo gaga, au adafaiweya kevakeva-nai kana kanina. Waitana, Iya kaliva yavuyavuku ada wa yaku awaega kani faine, e ada gavaiyamu-yo seyana gaito nuwafouna analutovona faina yana nuwanuwa gina veimeyeku ada gina kivetunuku dewa iwakana ada dewa koyona faidiya, aiyo?

³⁰ Kai akuga o akukevakeva faina ganavona vesiule Yaubada wagaine ke gana kanina, gavaiyona-yo tamo gaito taine aa o kevakeva gakanina faina gina awavekoyoyeku vaita gaitoma awaawatana gakanina? Aa-dina faidiya gavona vesiule Yaubada wagaine.

³¹ E ada kai kanakani o kai kanayuga o kai gavadewa kana faisewana, aga yada dewa matatabuna wagaidiya Yaubada anayegana kana kikilakaina.

³² Yada dewa kana itaveyabidi ada kana nuwanuwa kaliva faidiya, kai meIsileli o badi keke meIsileli o kai badi tovetumagana Yaubada yana ekalesiya wagaine. Keke iwakana tamo dewa kana gugaiye keke yadi nuwanuwa anafaiweya, e ada vaita kabala kasena yadi vetumagana anawai wagaine ke gina kivebeudi.

³³ Iya kaduwe yaku dewa matatabuna gaitaveyabidi, ada galuvaluva ke kaliva moyaidi gana kivemwamwalidi. Keke Iya tauku yaku iwakana faina gada gugugai, aku kaliva moyaidi yadi iwakana faina gagugugai e ada moyaidi adikibababala ina nuwagana Yaubada wagaine.

11

¹ Iya yami ebaita ani wana muliyeku anafaiweya

Keliso yaku ebaita Iya gamuliyena.†

Gavadewa tovetumagana adilauboda miyava-gauta oduodu wagaine.

² Gaawadavadavami faina gaitoma moyaina wagaidiya wanuwaududuku, ada yada dewa moyaina adivewala-dina gavele vedamami ani waitaveyabi-dewedewedi.

³ Aku nuwanuwaku wana alamane-dewedewena taidei anafaiweya. Kaliva seyana seyana anatoveimeya ani Keliso, vavine aditoveimeya ani moganedi, ada Keliso anatoveimeya ani Yaubada.

⁴ Kai tamo kaliva amimwatuguya giveoveola o kai gifalofalofisai aku kuluwana wagaine anakiwafi gimiyamiya, aga ina tauna anatoveimeya gikivevovomumuna, taine Keliso.

⁵ Ada kai vavine naginagidi** seyadi iveoveola o kai ifalofalofisai aku kuluwadi keke wa anakiwafi, aga taidei giveiyaiyaya vaita mine-dina aditoveimeya, banae moganedi ani keke ida vemoimoina, e ada ikivevovomumuna. Faina vavine-dina kuluwadi anakiwafi idibusoyogena, ani au vaita kuluwadi ikolina anafaiweya.

⁶ Kai gavavavine naginagidi kuluwa anakiwafi ina dibusoyogena, aga kuluwadi ida totona. Aku kai vavine kuluwadi inatoto gina vemaufu o kai

† 11:1 1Kol 4:16, Fip 3:17 ** 11:5 Maita-dina 5 ke ginau 13 (5-13), wadedeku kuluwa anakiwafi iinanana ani meGiliki bonadiya vona-nai 'vavine' ananuwanuwa ani 'vavine nagi-nagidi'. Tova tuwai-moena wagaine meIsileli adigiduwa-nai vavine kuluwadi ina kiwafina ani adiiyaiyaya badi naginagidi faina.

kuluwadi ina kolina, wada ebavovomumu. E ada au mine-dina kuluwadi ida kiwafina.

⁷ Aku kaliva ani Yaubada gibubudi Tauna yana veuluva anafaiweya, ada iivemalina Yaubada yana iwakana.[†] Taidei faina tova-nai kaliva ina veoveola o kai ina falofisai, aga keke gida luboda kuluwadi ina kiwafidi. Ada vevine ani moganediyo adiyegana yana iwakana iivemalina.

⁸ Faina tova-nai Yaubada kaliva nagona ke vavine nagona gibubudi, kaliva keke gida yegemo vavine wagaine-deya, aku aiyada vavine giyege-mona kaliva wagaine.[†]

⁹ Ada kaduwe keke kaliva gida bubudi vevine faidiya, aku vevine gibubudi kaliva faidiya.[†]

¹⁰ Taidei vuvuna-nai faina, ada kadu aneloseyavo iitaita faina, gilubodana vavine naginagidi kuluwadi ina kiwafina, wada iyaiyaya-nai ani veimeya dibune imiyamiya.

¹¹ E aku kaliva ke vevine imiyamiya Keliso yana yoo wagaine, ani keke luidi gida miyami adimwatuguya. Au kaliva vevine ina lemelemedi ada kaduwe vevine kaliva ina lemelemedi.

¹² Faina tova nagona, Yaubada vavine nagona gibubuna kaliva wagaine-deya nonogana kaliva seyana seyana muline itubutubuga, ani vevine wagaidiya itubuga. Aku kaliva ke vevine matatabudi ada gaitoma moyaina ani Yaubada adiebavevuvu.

¹³ Aku taumiyavo wana veimeya, kai tafalolo wagaine vavine seyadi ina veoveola Yaubada wagaine aku kuluwadi keke ida kiwafi, wada adi-

[†] 11:7 Eba 1:26-27 [†] 11:8 Eba 2:21-23 [†] 11:9 Eba 2:18

lauboda o kai keke?

¹⁴ Adagiduwa bademowa kaalamanena, kai gavakaliva kuluwana manamanawena aga wada ebavovomumu wagaine.

¹⁵ Aku vevine ani Yaubada kuluwadi manamanawedi giveledi kuluwadi anasebabala faina, ada taidei wagaine adiita gina veiveigavuna.

¹⁶ Aku kai gaito seyana nuwanuwana ina vevonavona taidei giduwa-nai faina, aga yaku laufata taide anafaiweya. Imeyavo Yaubada yana ekalesiya fafali tulina tulina wagaidiya ani moyaima amagiduwa au seya-moena, keke seyana tulina ada mulimuliye.

Sakalameni anakivetunuga faina.

¹⁷ E aku nuwanuwaku gana kivetunumi gaitoma seyana faina, taidei gaitoma-nai faina keke akufaiweya gana awaveiwakanemi. Faina tova tova wavagavagauta oduodu faina, ani yami vagautanai keke guwana iwakana, aku koyona.

¹⁸ Yaku ifufu nagona ani gakaiyanogala vaita tova-nai wavagavagauta oduodu faina, keke wada veveyoo seyana aku taumiyavo waluluidimi bou tulina tulina, ada wamiyamiya ludaka.† Valeya taidei ganogalina ke ganuwanuwa vaita tufona velemoena.

¹⁹ Anaita gilubodami taumiyavo wana luluidimi yoo tulina tulina wagaidiya ke wana vegaitomakavokavovoyemi, e ada wana itana badi gavega amimwatuguya Yaubada giawaveiwakanedi.

²⁰ Tova-nai wavagavagauta ke nodi wakanikani ke Kauveya wana vemoimoinena yana kani wagaine, ani wanuwanuwa vaita velemoena yana

† 11:18 1Kol 1:10-12

kani-nai wada kanikani ke wada vemoimoina, aku keke.

²¹ Faina imi seyana seyana yami aa waalialiyedi ani taumiyavo wakanikani miyatagodi, aku keke aa wada vutuvutugedi. Keke tubuiyamiyavo faidiya wada bodaboda, keke wada nuwanuwa faidiya. E ada tufomi mafa gilavulavumi, aku tufomi waini wayuyuga-faila ke wavekwavakwava.

²² Gavaiyamu ada imi wai taide anafaiweya wafaifaisewa yami miyavagauta wagaidiya? Yami dewa anaita vaita keke wa yami manawa e ada wadedeku wadakani ke wadayuga-vagata ayo wadaela. Ada gavaiyamu? Iwakana wagaimiya kai Yaubada yana ekalesiya wana itatagona, ada yana kalivayavo badi adiga keke, ani matadiya-mwaeya wakanikani-faila ke wakivevovomumudi, aiyo? Gavaiyamu gadavona wagaimiya? Evona ina gana davami taine yami dewa-nai faina? Keke, keke-mowa!

²³ Ina vona-nai gavaina Kauveya Tauna wagaine-deya, ani imi kadu tuwaina gavele vedamana wagaimiya. Gavewalemi taidei anafaiweya. Bogi-nai Yudasa yada Kauveya Yeisu giivemogatalena nibainavo wagaidiya, Yeisu beledi givaina,

²⁴ ada givona vesiule Yaubada wagaine giavaina, gikiineinena ke givona, "Taidei vovoku, imi faimiya gaawaegena. Taidei wana gugugaiyena akuebanuwaududu faina."

²⁵ Ada kani giavaina, kaduwe anafaiweya waini wa veina givaina ke givonedi, givona,

“Taidei waini ani Iya dayagiku,[†] ida dayaga-nai Yaubada yana veyavo anawai evaguna faina.[†] Gavatoveya wana yuyuna, ani wana gugaiyena ke wana nuwaududuku.”

²⁶ E ada gavatoveya taidei beledi-nai wana kanina ke vei-nai wana yugena, aga wana awamogatala Kauveya yana alika ide kaliva faideya. E ada Kauveya yana alika wana awamogatalena analaba ginayewa-vagilena.

²⁷ Taidei faina tova-nai Kauveya yana beledi kana kanina ada yana vei kanayuga wagaine, kai gaito seyana keke gida nuwanuwa tubuiyanavo faidiya ada yana dewa keke iwakana matadiya, aga banae wa yana koyona Kauveya vovona ke dayagina faina, anafaiweya badiyavo Yeisu iluvealikana. Faina taidei ani anafaiweya yada Kauveya vovona ke dayagina givegaitomakavokavovoyena.

²⁸ E ada kaliva seyana seyana nagona aseasena gina itauluuluvina, muliya Kauveya yana beledi gina kanina ke yana vei ginayuga wagaine.

²⁹ Faina kai tamo gaito Kauveya yana beledi gina kanina o kai yana vei ginayuga wagaine aku keke gida inana vaita moyaimi Kauveya vovona, aga yana kani-nai ke yana yuga-nai wagaidiya tauna gikivelaubodana ke Yaubada yana matavuloga gina nuwagana.

³⁰ Tainei faina kaliva tufona moyaidi amimwatuguya nodi wakabekabebena ke waveoga, ada tufomi yawaidi giavaidi.

[†] 11:25 Iyeg 24:8 [†] 11:25 Iyel 31:31-34, Luk 22:20

³¹ Aku kai nagona taudeyavo aseaseda kana itavenuvenuwadadane-dewedewena ke yada nuwanuwa koyodi kana vaiyavuledi, aga Kauveya keke gina vevonayavugida ke matavuloga gina veleda.

³² Aku tova-nai Yaubada gina vevonayavugida ke matavuloga gina veleda, tayuwe wagaine gikivetuvetunuda e ada kana nuwawilana ke yada dewa kana kivetunudi.[†] Wada iwakana. Keke iwakana Bana gina segeda ada wa yada koyona kanamiya, e ada aimo tova-nai babi anakalivayavo gina vevonayavugidi ke gina vematavulogidi, ide kaduwe adamatavuloga kana nuwagana.

³³ E ada tubuiyakuweyavo, tova-nai wana vagavagauta ke Kauveya yana aa wana kanina, aga wana bodaboda yami yoo moyaidi faidiya. Ada bademowa inaela-yabu ee, matatabumi aigaigabuya wana vebutu wanakani.

³⁴ Kai seyana gaito mafa gilavuna, ani gilubodana banae yana manuweya gida kani-vagata ayo gidaelai. Keke iwakana yami vagauta kai ginakoyo e ada amimatavuloga wana nuwagana Yaubada nimane.

E aku gaitoma-dina aditufo ani gavatoveyayo ganaelai wagaimiya, aga adikivetunu gana ifufuyedi.

12

*Adavutuvutuga tulina tulina Yaubada
Aluwaluwana giavetavetaledi yana yoo*

[†] **11:32** Iyob 5:17-18, Sam 94:12, 119:67-68,75-77, Vona 3:11-12, Ibel 12:5-6, Ive 3:19

wagaideya.

¹ Tubuiyakuweyavo, kadu yami toolidadana seyana gana fatana, tainei adavutuvutuga-dina Yaubada yana nuwadogeya giveleveleda faidiya. Nuwanuwaku gana kivemalina ke nuwami ginamali-dewedewena.

² Waitana, tova tuwaina wagaine imi aimo Yaubada keke wada alamane, ada yaubada fwayafwaya keke wa bonadi inagonagoyemi ke waoduodu wagaidiya.

³ Taidei faina nuwanuwaku nuwami gina malina vaita kai Yaubada Aluwaluwana tamo gaito ginagonagoyena, ani keke tamo tova ginavona, “Yeisu ani alatabutabuna.” Ada kai seyana gaito gina vonaga, “Yeisu ani Kauveya velemoena,” taine yana vona-nai ani Aluwaluwa Tabuna ginagonagoyena faina.

⁴ Aku vutuvutuga Aluwaluwa Tabuna giveleveleda ani tulina tulina, aku tovelavela-nai ani anakaibe-mowa Banae Aluwaluwa Tabuna.†

⁵ Ada wai tulina tulina imiyamiya wagaidiya kagugugai Kauveya faine, aku Kauveya-nai faine kagugugai ani anakaibe-mowa.

⁶ Kaduwe gugai tulina tulina imiyamiya ke kana gugugaiyedi, aku toyogina-nai wagaine moyaida gugai kagugugaiyedi, ani vuvuna au Banae Yaubada anakaibe-mowa.

⁷ E ada ide tovetumagana seyana seyana wagaideya Aluwaluwa Tabuna-nai gimiyamiya, ani adavutuvutuga tulina tulina gikiveyegemonina e ada kana vevegugaiyedi ke moyaida yada iwakana kanuwanuwagana wagaine-deya.†

† 12:4 Lom 12:6-8 † 12:7 1Kol 14:26

⁸ Kaliva seyana anavutuvutuga Aluwaluwa Tabuna giavetavetalena ke banae nuwauya anavona gina awamogatalena. Kadu kaliva seyana anavutuvutuga Aluwaluwa Tabuna-nai giavetavetalena ke banae alamana anavona gina awamogatalena.

⁹ Kaduwe kaliva seyana anavutuvutuga Aluwaluwa Tabuna giavetavetalena ke banae yana vetumagana toyogina. Ada kaliva seyana Aluwaluwa Tabuna-nai toyogina seyana giavetavetalena ke banae toveoga gina kivebwainidi.

¹⁰ Ada kadu kaliva seyana Aluwaluwa Tabuna toyogina giavetavetalena ke banae gugai ebameyasidobodobo tulina tulina gina gugaiyedi. Kadu kaliva seyana Aluwaluwa Tabuna giavetavetalena alamana ke Yaubada yana nuwanuwa gina falofisaiyena. Kadu kaliva seyana Aluwaluwa Tabuna giavetavetalena alamana e ada gina inanana ifufu seyana o kai dewa seyana anavuvu, kai Aluwaluwa Tabuna o kai aluwaluwa koyona o kai kaliva aluwaluwana. Kadu kaliva seyana anavutuvutuga ani valeya gina vonayena meya keke gida alamane wagaine, ada kadu kaliva seyana Aluwaluwa alamana giavetavetalena e ada anafata meya-nai gina kivilana ke kaliva nuwadi gina malina.

¹¹ Taidei vutuvutuga-dina moyaina ani Aluwaluwa Tabuna anakai-be-mowa gigugugaiyedi. Banae giavetavetala ide seyana seyana wagaideya yana nuwanuwa anafaiweya.

Keliso yana yoo ani vovo seyana, talai tulina

tulina nodi.

¹² Waitana, kaliva vovona seyana aku vovona anatalai moyaina, ada talai-dina ani moyaina nonogana ivevovo seya-moena. Ada kadu anafaiweya Keliso vovona.[†]

¹³ Faina Aluwaluwa seya-moena wagaine moyaida Yaubada gikivebabitaisoda ke kaluku Keliso yana yoo wagaine, ina vovona seya-moena. Keke tamo gavana kai tufoda meIsileli o kai tufoda keke meIsileli, ada keke tamo gavana kai tufoda togugai yogoyogodeyavo o kai tufoda yavuyavudeyavo ke taudeyavo yada gugai wagaidiya kaveiveimeyeda. Au Yaubada ani Aluwaluwa Tabuna seya-moena giawaegena wagaideya, ada Banae wagaine giveyuda.[†]

¹⁴ E ada vona velemono vovoda anatalai keke seya-moena, aku talaida moyaina.

¹⁵ Kai kaliva seyana agena wa awana ada kai gida vonaga, “Iyayeku ani keke nima, e ada Iya keke gaitoma lakaina. Taidei faina vovoda anamiya ani Iya keke akulauboda.” Bana agenai kai gidavona anafaiweya nonogana vovoda anamiya ani bana analauboda velemono.

¹⁶ Kaduwe kai taga wa awana ada kai gida vonaga, “Iyayeku ani keke mata, e ada Iya keke gaitoma lakaina. Taidei faina vovoda anamiya ani Iya keke akulauboda.” Bana taganai kai gidavona anafaiweya nonogana vovoda anamiya ani bana analauboda velemono.

¹⁷ Kai vovoda mata seyana gagana, aga keke meyameyaganina adafata kana nogala. Kadu kai

[†] 12:12 Lom 12:4-5 [†] 12:13 Gal 3:28

vovoda taga seyana gagana, aga keke meyameyaganina gavana magana kanayau.

¹⁸ Aku Yaubada keke vovoda gidabubu tayuwe anafaiweya. Banae vovoda anatalai seyana seyana vovodeya gisedi yana nuwanuwa anafaiweya.

¹⁹ Kai vovoda anatalai moyaidi ida veseyanamowa, aga wada keke vovo.

²⁰ Aku vona velemono vovoda anatalai ani moyaina, e aku vovoda seyana.

²¹ Keke meyameyaganina kaliva seyana matana ani nimana gina dibusoyoge ginavona, "Iya keke nuwanuwaku oyeni. Au Iya tauku akukaibe akufata ke ganamiya iwakana." Kaduwe anafaiweya keke meyameyaganina kuluwana ani agena gina dibusoyoge ginavona, "Iya keke nuwanuwaku oyeni. Au Iya tauku akukaibe akufata ke ganamiya iwakana."

²² Keke anafaiweya. Aku aiyada vovoda anatalai-dina kanuwanuwayedi vaita keke toyo-gidi ani kai badi keke ida miyami, aga vovoda keke wa analutovona iwakana gida miyami.**

²³ Ada talaida-dina kanuwanuwayedi vaita adivemoimoina kabisona, ani kasesebabali-dewedewedi nuya wagaine ke kaitaitaveyabidi velemono. E ada badi talai-dina keke adilauboda kaliva ina itaitadi ani kasebabali-dewedewedi,

²⁴ aku mali talai-dina vovoda wagaine ebaitana ani keke adisebabala faina kada nuwanuwa. Au ebaitadi imiyamiya. Aku Yaubada Banae

** **12:22** Paulo yana vona maita 22-26 ani Yaubada yana kali-vayavo faidiya givonaluvefosau vovoda aditalai wagaidiya.

vovoda anatalai moyaidi gibubu-tamwaidi, ada talai-dina tufodi kanuwenuwedi vaita keke gaitoma lakaina, ani wa yada vemoimoina kaitaitaveyabidi.

²⁵ Taidei anafaiweya vovoda anatalai gibubu-tamwaidi e ada keke tamo ludaka vovo wagaine gina miyami, aku talai moyaidi nodi ina faifaisewa aigaigabudi ke ina veitaitaveyabina iwakana.

²⁶ E ada kai vovoda talaina seyana gina uloulolo, aga talaida moyaidi nodi ina ulolovaisena. Ada kai vovoda talaina seyana anaawadavadava gina nuwagana, aga talaida moyaidi nodi ina vemwamwala.

²⁷ E aku imi moyaimi nodi ani Keliso vovona, ada imi seyana seyana ani Banae vovona talaina seyana.†

²⁸ Ada vutuvutuga tulina tulina Yaubada givutugedi tovetumagana seyana seyana nimane yana ekalesiya wagaine taidei anafaiweya.

Nagona ani afositolo.

Anavelu ani falofitayavo.

Anaveto ani tovewalayavo, badiyavo Yaubada yana vona ananuwanuwa anatovewala.†

Muline badiyavo gugai ebameyasidobodobo ifaifaisewadi,

kadu badi adivutuvutuga toveoga
ina kivebwainidi,

kadu badiyavo ivetoleme kaliva wagaidiya.

Ada badi Yaubada nuwauya giveledi ke kaliva
yadi faisewa ina itaveyabina iwakana.

† 12:27 Lom 12:5 † 12:28 Efes 4:11-12

Ada badiyavo Yaubada Aluwaluwana
giawaveleveledi ke meya tulina tulina
wagaidiya iifuifufu.

Taidei anafaiweya vutuvutuga tulina tulina
Yaubada givutugedi wagaideya.

²⁹ Aku gavaiyamu, Yaubada yana kaliva
matatabudi afositolo? Keke, au tufodiga. O
kai kaliva matatabudi falofitayavo? Keke, au
tufodiga. O matatabudi adifata ina vetovewala
iwakana Yaubada yana vona faine? Keke, au
tufodiga. O kaliva matatabudi adifata ke gugai
ebameyasidobodobo ina faifaisewadi? Keke, au
tufodiga.

³⁰ Kadu keke yana kaliva moyaidi adivutuvutuga
toveoga ina kivebwainidi, au tufodiga. Keke moy-
aidi ida ifufu meya tulina tulina wagaidiya, ada
keke moyaidi meya tulina tulina ida kikiviladi.

³¹ Aku vutuvutuga-dina kaliva ilemeleme-moedi
ani wana idibumwaiga ke wana nuwagadi.

E aku wai seyana ani iwaka-vagaina ayo mali
vutuvutuga-dina matatabuna ani gana vewalemi.[†]

13

Nuwakabubu faina Paulo giifufu.

¹ Kai gana ifuifufu meya tulina tulina wagaidiya
kadu anelose meyadiya aku keke wa yaku nuwak-
abubu, aga Iya anafaiweya vaita kaula ida yuve-
kavokavovo o kai tini kakawana ida luvekevekebo.

² Kai gana falofisai, ada kai Yaubada
yana nuwanuwa sewasewavuyena moyaidi

[†] **12:31** 1Kol 13:1-8,13, 14:1

faidiya nuwaku gina malina, ada kai alamana lakai-vagina gana nuwagana, ada kai yaku vetumagana toyogi-moena faina oya gana veimeyena ke ginanau malifafaliya ee, kai taidei gaitoma-dina moyaina gana gugaiyedi aku keke wa yaku nuwakabubu, aga Iyayeku au gaitoma-kavokavovo.

³ Kai yaku giba matatabuna gana vutugedi tofanifani wagaidiya, ada kai vovoku gana awaegena alika wagaine ke ai alalata wagaine inaleva gina alaina, aku kai nuwakabubu keke aseasekuya gida miyami, aga keke maita ina lemeku, keke-mowa.

⁴ Kai ide wa yada nuwakabubu, aga kaliva kana atuvefailedi† ada wa yada nuwakabubu kana dewedi iwakana.† Kadu keke kaliva yadi giba o kai adiivi kana itaitadi ke kana agouga faidiya.† Keke wa yada nuwalaka kana gakaikai. Keke wa yada nuwalaka taudeyavo kana itaitada vaita ide iwaka-moeda ayo mali kaliva,†

⁵ kadu keke kaliva kana awadamanedi. Kai ide wa yada nuwakabubu, aga keke taudeyavo yada nuwanuwa kana imanimaniniye, ada keke kanamadu nuwakoyo gaitoma-kavokavovo faidiya. Kaduwe kai kana nuwakoyo, aga keke yada nuwakoyo-nai kana kitaitai.

⁶ Kai ide wa yada nuwakabubu, aga tubuiyadeyavo yadi dewa koyona faine keke kana vemwamwala, aku tubuiyadeyavo idewadewa iwakana ke ivonavona velemono

† 13:4 Vona 10:12, 1Pi 4:8 † 13:4 Gal 5:22, Efes 4:32, Kol 3:12

† 13:4 Gug 7:9 † 13:4 2Tim 3:2, Tai 1:7

wagaine, kana vemwamwala faine.†

⁷ Kai ide wa yada nuwakabubu, aga kai tubuiyadeyavo inadewa koyona wagaideya, au kana atuatuvefailedi. Ide wa yada vetumagana kaliva faidiya, wa yada nuwavetumagana kaliva faidiya, ada kaduwe gavavita ina yegeyegemona wagaideya, au kana atuvefailedi.

⁸ Nuwakabubu keke gina avovoli, au miyamiyani-vagaina. Aku Yaubada yana nuwanuwa kaliva ifalofisaiyedi, ani vutuvutugana gina avovolina. Ada Yaubada yana nuwanuwa kaliva ivonavonayedi meya tulina tulina wagaidiya, ani gina ilovau. Ada kaduwe Yaubada yana alamana giveleveledi kaliva ke iawamogatalena, ani gina ilovau.

⁹ Faina tova malinai alamana-nai Yaubada giveleveleda ani wada tufona gaga, ada yada falofisai ani wada tufona gaga.

¹⁰ Aku aimo Yaubada gaitoma moyaina luluyabu-moedi gina seyegemonedi, e ada tova tayuwe wagaine vutuvutuga-dina wada tufona gaga imiyamiya malinai,** ani ina avovolidi.

¹¹ Waitana, tova-nai Iya kabisoku, gaifui-fufu, ganuwanuwa, ada gaitoma tulina tulina ganuwanuwayedi kwamana anafaiweya. Aku tova malinai bademowa gaveinala ke gaveasekumaga, e ada kwamana anadewa gasegena.

¹² Vona tainei givona ide tovetumagana faideya. Faina tova malinai keke nuwada gidamali velemoena gaitoma moyaina

† **13:6** 2Iyo 4, 3Iyo 1:3-4 ** **13:10** Taidei vutuvutuga-dina wada tufona gaga ani falofisai, meya tulina tulina, ada alamana-nai Yaubada givelevelena kaliva.

faidiya, aku anafaiweya vaita gavana seyana kelasi wagaine kada itaowaowa.** Aku tova-nai kanalaka gabameya, aga nuwada ginamali-dewedewena gaitoma moyaina faidiya, anafaiweya vaita seyana gaito nodi kada vemagigiitaita.† Tova malinai tufonaga kaalamanena, e aku tova tayuwe wagaine gaitoma moyaina kana alamane-yabudi anafaiweya ide Yaubada gialamane-yabuda.

¹³ E ada malinai gaitoma toiye lakaidi imiyamiya, vetumagana, nuwavetumagana, ada nuwakabubu. Aku gaitoma-nai wai ginagona ani nuwakabubu.

14

Falofisai ada meya tulina tulina anaifuifufu.

¹ Tubuiyakuweyavo, taumiyavo wana awaegemi ke nuwami wanase-vagaina nuwakabubu anawai wagaine,† aku kaduwe nuwami wana sevelavelalaina ke Aluwaluwa Tabuna yana vutuvutuga tulina tulina wana nuwagadi. Aku vutuvutuga-nai lakai-moena wada nuwanuwa velemoena faine ani falofisai.†

² Faina banae gaito Aluwaluwa Tabuna gi-alavelevelena ayo meya tulina wagaine giifui-fufu, ani keke kaliva wagaidiya gida ifuifufu aku Yaubada wagaine. Nuwanuwa sewsewavuyena

** **13:12** Tova tayuwe wagaine Paulo taide leta-nai givetokilumina ani kelasi-dina ibubudi badi keke mamali-moedi. Taidei faina givona ani "kelasi wagaine kada itaowaowa". † **13:12** 1Iyo 3:2 † **14:1** 1Kol 16:14 † **14:1** 1Kol 14:39

giifuifufuyedi Aluwaluwa Tabuna yana toyo-gineya, ada keke tamo gaito gida alamane vona-dina adialamana.

³ E aku banae gaito Aluwaluwa Tabuna gialavelevelena ayo gifalofisai, ani kaliva wagaidiya giifuifufu e ada yadi vetumagana gina yogodi, ginavona asevatudi, ada nuwadi gina kiveiwakanena. Faina wada vona-nai iifuifufuyena, ani kaliva adifata ina nogalina ada nuwadi gina malina.

⁴ Banae-nai Aluwaluwa Tabuna gialavelevelena ayo meya tulina wagaine giifuifufu, ani tauna yana vetumagana gagana giyogoyogona, aku banae gifalofalofisai ani Yaubada yana yoo moyaidi yadi vetumagana giyogoyogodi.

⁵ Iya nuwanuwaku moyaimi meya tulina tulina wagaidiya wana ifuifufu anafaiweya Aluwaluwa Tabuna gialavelevelemi, aku nuwanuwaku lakai-moena wana falofalofisai e ada kaliva adifata nuwadi gina malina. Gaito gifalofalofisai ani yana leme lakaina tovetumagana wagaidiya, aku gaito giifuifufu meya tulina tulina wagaidiya ani yana leme keke lakaina. Aku kai tauna yana vona adialamana gina kivilana, aga yana leme gina veinala, e ada toekalesiya nuwadi gina malina ke yadi vetumagana ginayogo ginalaka.

⁶ Tubuiyakuweyavo, kai gadaelai wagaimiya ke gada ifufuyemi meya keke wada alamane wagaine, aga gavana anaiwakana wagaimiya? Keke tamo. Aku kai gana ifufu wagaimiya meya waalamanena wagaine ada gana vonemi seyana gaitoma Yaubada giivemogatalina wagaikuya, aga taine yaku ifufu-nai gina lememe. O kai tamo alamana

Yaubada giveleku gana kivemalina wagaimiya, o kai tamo yana nuwanuwa gana falofisaiyena, o kai valeya iwakana anavewala seyana faina gana vewalemi, aga anaiwakana lakaina wagaimiya.

⁷ Waitana, gaitoma kwagekwagedi anafaiweya kulele o kai modawa, ani keke wayawaidi nonogana gilubodana bonabona-dina ina yegemona wagaidiya ani nuwada mamalina faine. Kai seyana gaito kulele gina yuve-kavokavovona, aga tonogala keke ina alamane gavakweli giyuveyuve. O kai seyana gaito modawa gina lubokobokona, aga tonogala keke ina alamane gavatavola anakaiwesi gilavulavu.

⁸ Kaduwe tolugaviya faidiya, badi yadi tova lugaviya ani givelilivana, kai seyana kaliva kaula giyuve-kavokavovona e ada agona ananogala keke ida inana, aga gaito gina kidewadewa lugaviya faine?[†]

⁹ Tainei anafaiweya imiyavo. Kai yami vona kaliva waifuifufuyedi ani meya wagaine keke ida alamane, aga gavaiyamu gaito gina alamane yami ifufu ananuwanuwa? Au yami vona bolimana butuna anafaiweya.

¹⁰ Babi matatabuna wagaine meya tulina tulina wagaidiya kaliva iifuifufu, ada meya-dina adivona matatabudi ani wa adinuwanuwa.

¹¹ Aku kai tamo gaito gina ifuifufu wagaikuya aku meyana keke gada alamane, banae kaliva-nai wagaikuya vaita mali kaliva meyana tulina, ada Iya banae wagaine vaita mali kaliva meyaku tulina.

[†] **14:8** Naba 10:9, Iyel 4:19

12 Tainei anafaiweya imiyavo. Imi nuwanuwami lakaina Aluwaluwa Tabuna yana miyami gina seyegemonena yana vutuvutuga tulina tulina wagaidiya, e aku yami nunu wadasei ke Yaubada yana kalivayavo wana kikivetoyogidi taidei vutuvutuga-dina wagaidiya e ada ina lemelemedi velemoena.

13 Taidei faina kai seyana gaito Yaubada yana matawa gina ifuifufuyena meya tulina wagaine, aga gida veoveola ke Yaubada gina lemena ke meya-nai ananuwanuwa gina kivilana, e ada kaliva nuwadi gina malina faine.

14 Kai gana veoveola meya seyana keke gada alamane wagaine, aga aluwaluwaku giveoveola aku keke nuwaku gidamali gavana gavonevone.

15 E ada gavaiyamu gadagai? Gana veoveola aluwaluwakuya meya keke gada alamane wagaine, aku kaduwe gana veoveola yaku nuwanuwa wagaine meya gaalamanena wagaine. Ada kweli davadava gana kwelikweliyedi aluwaluwakuya, aku kaduwe gana kweli yaku nuwanuwa wagaine.

16 Faina kai Yaubada uawadavadavana aluwaluwa wagaine aku seyana kaliva ineneku keke gida alamane meya-nai, aga keke anafaiweya ya vona-nai gina awaveiwakane ke ginavona, "Ika anafaiweya." Faina nuwana gina voganina.

17 Velemoena uvona vesiule iwaka-moena, aku bana kaliva-nai keke nuwana gidamali, ani tainei keke ebaleme ayo wagaine yana vetumagana gina kivetoyogi.

18 Gavesivesiule Yaubada wagaine faina yaku ifufu meya tulina tulina Aluwaluwa Tabuna gi-alaveleveleku, ani moyai-moena ayo imi yami ifufu meya tulina tulina wagaidiya.

19 E aku tafalolo anavagauta wagaidiya, nuwanuwaku vona faifi gagana wa yaku nuwanuwa gana inanadi e ada kaliva alamana ina vaina yaku vewala wagaine. Tainei iwaka-moena ayo vona gana lubulabulavina meya tulina wagaine badi keke ida alamane.

20 Tubuiyakuweyavo, keke wana gabiyabiyama taidei gaitoma-dina adinuwanuwa faidiya. Aku gaitoma koyodi faidiya ani wana veanafaiweya biyabiyama, faina biyabiyama aimo keke ida alamane gavaiyamu koyona ina gugaiye. Aku yami nuwanuwa wagaine ani kaliva kumagina anafaiweya wada nuwanuwa.

21 Buki Tabu wagaine Yaubada givona,

“Mali kaliva meyadi tulina tulina imiyamiya
mali fafali wagaine,
ani badi awadiya Iya gana ifufu taidei yoo-nai
wagaidiya.

Aku auwe keke bonaku ina nogali.” †

22 Taidei vona-nai wagaine kaitana vaita kai seyana gaito gina ifufu meya tulina Aluwaluwa Tabuna gialavelevelena wagaine, ani wada iyaiyaya-nai keke tovetumagana faidiya, aku aiyada ifuifufu-nai ani badi keke ida vetumagana faidiya. Aku kai gaito seyana Yaubada yana nuwanuwa gina falofisaiyena, aga wada keke

† 14:21 Ais 28:11-12

badi gavega keke ida vetumagana faidiya, aku aiyada badi tovetumagana adileme faine.

²³ E ada kai tovetumagana matatabu-moemi wana vagauta ada moyaimi wana ifuifufu meya tulina tulina wagaidiya, aku gavega keke tovetumagana o kai gavega keke wa yadi alamana meya-dina faidiya ani inaluku wagaimiya, aga inavona vaita moyaimi wavekabakabaleya.

²⁴ Aku kai moyaimi wana falofalofisai e aku seyana gaito keke tovetumagana o kai seyana gaito keke wa yana alamana meya-dina faidiya, ani ginaluku wagaimiya ke yami vona gina nogalidi, aga yana koyona aseasena gina onana. Ada gina lutovonina vaita analauboda banae Yaubada yana matavuloga gina nuwagana.

²⁵ Ada taidei gaitoma-dina gisewavuyedi nuwainagene, ani bana gina alamanena wada keke sewasewavuyedi aku velemono yegeyegemonidi, e ada gina iboula-mowa babi wagaine ke gina oduodu Yaubada wagaine ada ginavona, "Vona velemono Yaubada amimwatuguya gimiyamiya."

Gavaiyamu yada vagauta oduodu faina kada sedewedewe.

²⁶ E ada tubuiyakuweyavo, gavaiyamu kadavona vutuvutuga-dina faidiya? Taide anafaiweya. Tova-nai wana vagavagauta oduodu faina, kaliva seyana wagaimiya kweli davadava gina kweliyena, seyana Yaubada yana vona gina vewalayena, seyana Yaubada yana nuwanuwa seyana givemogatalina wagaine ani gina ifufuyena, seyana ani matawa Aluwaluwa

Tabuna gialavelevelena gina ifufuyena meya tulina wagaine, ada kaduwe seyana matawa-nai ananuwanuwa gina kivilana. Vutuvutuga moyaina wavegugaiyedi wagaine, yami nunu ani tovetumagana yadi vetumagana wanayogodewedewedi e ada yadi vetumagana ina toyogina.

²⁷ Kai tufomi nuwanuwami wana ifufu meya tulina tulina wagaidiya, kaliva adiselu o kai aditoto gagana ina ifufu. Wada anafata. Keke matatabudi ina ifufu tova seyana wagaine, aku kaliva seyana seyana yana mwatugu wagaine gina ifufu, ada tova-nai gina luyabu ayo tamo gaito yana ifufu-nai gina kivilana.

²⁸ Aku kai ineneku yami yoo wagaine keke tamo gaito gida miyami-yo anafata gina kivila, aga gavakaliva nuwanuwana gina ifufu, ani auwe gina kuluna vagauta-nai wagaine aku nuwainagene-deya gina ifuifufu Yaubada wagaine.

²⁹ Kaduwe anafaiweya falofita. Gilubodana adiselu o kai aditoto badi matawa Aluwaluwa Tabuna gialaveleveledi ani ina falofisaiyedi, e aku imi wavanenegena yadi ifufu-dina ani wana venuwadadane-dewedewedi kai imuliyena Yaubada yana nuwanuwa o keke.[†]

³⁰ Aku kai yami miyavagauta wagaine tamo gaito bademowa gifalofalofisai aku Aluwaluwa Tabuna yana nuwanuwa gina yegemona kadu gaito seyana wagaine, e ani gina mididi ke bana kaliva-nai nagona gifalofalofisai ani gina ilovau, aku tubuiyana matawa-nai anavelu givaina ani gina falofisaiyena.

[†] 14:29 1Tes 5:20-21, 1Iyo 4:1

³¹ Taidei anafaiweya moyaimi amifaiweya wana falofisai seyana seyana, e ada matatabumi alamana wana vaina ke yami awaega Keliso wagaine wana asevatu.

³² Badi gavega falofita ani aluwaluwadi taudiyavo yadi veimeya dibune gimiyamiya, e ada adifaiweya inaboda yadi mwatugu faina ke ina ifufu.

³³ Faina Yaubada keke nuwanuwana vona anataladamadama yada vagauta oduodu wagaidiya e ada kaliva ina nuwavogana, aku nuwanuwana inamiya aigaigabu nuwaniwalova wagaine.

Aku giduwa-nai Yaubada yana yoo tabutabudiyavo yadi ekalesiya moyaidi wagaidiya imulimuliyena,

³⁴ ani kadu yami ekalesiya anavagauta wagaine, vevine keke ida toolidadana bodaboda. Faina keke wa adiawaega ke ina ifuifufu tafalolo anavagauta wagaine, aku aiyada ida miyamiya kaliva yadi veimeya dibune. Taide anafaiweya Yaubada yana Veimeya anabuki wagaine givona.

³⁵ Kai tamo gavana faine nuwanuwadi alamana ina vaina, aga adilauboda moganediyo ina toolidadanedi yadi manuweya. Faina tafalolo wagaine kai vevine ina ifufu aga wada keke iwakana, au keke-mowa gida luboda.

³⁶ Gavaiyamu wanuwanuwa, vaita Yaubada yana vona gimaduyegemona imi wagaimiyadeya? Ada evona imi yoo-mina gagana wanuwanuwa, aiyo?

³⁷ Kai tamo gaito ginuwanuwa vaita bana falofita, o kai givetumagana vaita Yaubada Aluwaluwana ginagonagoyena, aga analauboda

nuwana gida malina vaita gaitoma-dina gavetove-tokilumidi wagaimiya ani Kauveya Yeisu yana veimeya, ada nuwanuwana kana muliyedi.

³⁸ Kai tamo gaito veimeya taidei gina yavuyogena, aga kaduwe banae tauna Yaubada gina yavuyogena.

³⁹ E ada tubuiyakuweyavo, taidei yaku vonanai anaitava ani taidei anafaiweya. Wayami idibumwaiga yami nuwanuwa wanasena ke wana falofisai. Aku badi gavega matawa iifuifu-fuyedi meya tulina tulina wagaidiya, ani keke yadi wai wana sebadaboda.

⁴⁰ Aku gaitoma-dina moyaidi ani wada gugugaiye-dewedewedi, ada yami vagauta wada imalamalabubunina.[†]

15

Keliso yana yawa-vagila faina.

¹ Tubuiyakuweyavo, nuwanuwaku nuwami gana talamutuna tainei Keliso anavaleya iwakana nagona galumamalena wagaimiya faine. Tainei valeya-nai wavaina ke taumiyavo waawaegemi wagaine ada bana wagaine wamidimididi toyogina,

² ada kaduwe valeya-nai ani Yaubada yana kibababala anawai faimiya. Aku ifufu-nai galumamalena wagaimiya ani wana kidonena. Keke iwakana wanasege aenanai Keliso wavetumagane kavovona.

³ Vewala matatabuna Yaubada giveleku wagaidiya, ani vewala seyana lakai-moena gavele

[†] 14:40 1Kol 14:32-33

vedamana wagaimiya, tainei Keliso gialika yada koyona faina Buki Tabu givonayena anafaiweya.†

⁴ Ada didikula luwa wagaine isena, aku ya-dayada anaveto wagaine Yaubada gisiveyawana alikeya.† Buki Tabu givonayena anafaiweya.†

⁵ Giyawa-vagila muline, giyegemona Pita** wa-gaine, ada muliya kaduwe giyegemona afositoloyavo adituwelo wagaidiya.†

⁶ Ada kaduwe seyana tova giyegemona anatovetumaganayavo yoo lakaina wagaidiya, adiyoo faifi analedi (500) wa anavetutamwata anafaiweya. E ani yoo-dina moyai-moedi aimo wayawaidiyavo imiyamiya, aku tufodi bademowa ivealialika.

⁷ Kadu muliya giyegemona Iyemesa wagaine, ada mali toveya giyegemona yana afositoloyavo matatabudi wagaidiya.†

⁸⁻⁹ Ada anaebalauyabu-mowa Iya kaduwe wa-gaikuya giyegemona.† Iya tuwaina ganaunau fafali moyaidi wagaidiya ke Yaubada yana ekale-siya anakalivayavo gakiveuloulolonidi, e ada Iya keke akulauboda ina vewagaku afositolo. Iya anafaiweya bebeta seyana gitubuga, banae yana tova tubuga keke gida nuwaga wagaine gitubuga, e ada afositolo moyaidi wagaidiya-deya Iya keke wa akuyegana.

¹⁰ Aku Yaubada yana nuwadogeya ginuwakalikaliyeku e ada gaveafositolo. Ada keke gida nuwakalikaliye-kavovoku aku giveguwa

† **15:3** Ais 53:8-9 † **15:4** Luk 24:46, Gug 2:24-32 † **15:4** Sam 16:10, Ais 53:10 ** **15:5** Pita anayegana vona Giliki wagaine ani Sifasi. † **15:5** Mak 16:14, Luk 24:34,36, Iyo 20:19,26, Gug 10:41
 † **15:7** Luk 24:50 † **15:8-9** 1Kol 9:1

yawaiku wagaine, e ada gafafaisewa toyogimoena[†] ayo afositolo velugadiyavo. Aku ida keke vaita tauku yaku toyogineya gada gugai, aku aiyada Yaubada wa yana nuwadoga yana toyogina givaleku ke toyogina-nai wagaine gagugugai.[†]

¹¹ Ada au kai afositolo velugadiyavo ina lumamala wagaimiya o kai Iya gana lumamala, yama laumamala ananuwanuwa au seyana, ada taidei wavetumaganena.

Yaubada Keliso alikeya gisiveyawana, ada kadu tovetumaganayavo alikeya gina siveyawadi.

¹² Ime tova moyaina aawatalatalaina avon-avona, “Yaubada Keliso gisiveyawana alikeya.” E aku gavaiyamu-yo tufomi wavona kwavakwava vaita keke meyameyaganina toalika inayawa-vagila?

¹³ Waitana, kai toalika keke velemoena inayawa-vagila, aga kaduwe Yaubada keke Keliso gida siveyawa.

¹⁴ Ada kai Yaubada keke Keliso gida siveyawa alikeya, aga yama laumamala ani gaitomakavokavovo, kaduwe yami vetumagana Keliso wagaine gaitomakavokavovo.

¹⁵ Kaduwe kai yami vona ani vona velemoena ada velemoena kaliva keke inayawa-vagila, aga Yaubada kadu keke Keliso gida siveyawa alika wagaine. Ada kai taine anafaiweya, aga imeyavo adavetove toawatalatalaina fwayafwaya Yaubada faine, faina tova moyaina awaawamogatala, avona, “Yaubada Keliso gisiveyawana alikeya.”

[†] 15:10 Kol 1:29 [†] 15:10 2Kol 3:5

¹⁶ Faina kai Yaubada keke toalika gina siveyawa alikeya, kaduwe keke Keliso Bana gida siveyawa alika wagaine.

¹⁷ Ada kai velemono Yaubada keke Keliso gida siveyawa, aga yami vetumagana ani keke wa vuvuna ada aimo wa yami koyona wamiyamiya, faina Yaubada keke gida venuwaegedi.

¹⁸ Ada kaduwe, kai Yaubada keke Keliso gida siveyawa alikeya, aga badi gavega ivetumagana Keliso wagaine aku bademowa ialika ani bade ikwaa-mowa, keke wa adikibababala.

¹⁹ Ide malinai yawaida-nai babiya kamiyamiyanena ani Keliso nodi kaveseyana, ada Banae kanuwavetumaganena vaita yada veseyana-nai aimo gina naunau yawaida-nai yada alika muline. Aku kai keke kada nuwavetumagane vaita yada veseyana-nai aimo gina naunau yada alika muline, aga ide nuwakalikalideyavo velemono.

²⁰ Aku keke. Faina vona velemono Yaubada Banae Keliso gisiveyawa-vagilena alikeya, ada tainei faina kaalamanena aimo badi yana kalivayavo ienowavulu alikeya ani kaduwe gina siveyawa-vagiledi. Keliso yana yawa-vagila wai ginagona wagaine,** kanuwaveyalaina

** **15:20** Bavagu ana aa nagona meIsileli ina vaina ani wada--nai ivelevele-kavovoyena Yaubada wagaine. Ada moyaidi ivelevelena aku inuwanuwa vetumaganena vaita bavagu anamatatabuna aimo kadu gina yegemona. E ada taidei maita-nai wagaine Paulo givonaluvefosau Keliso yana yawa-vagila faine, ada ananuwanuwa ani Banae nagona giyawa-vagila e ada aimo yana yoo anamatatabuna kadu inayawa-vagila.

ide yana kalivayavo yada yawa-vagila wai gina mulina.†

21 Waitana, kaliva seyana wagaine alika giyegemona.† Aku kaduwe anafaiweya, kaliva seyana wagaine yawa-vagila giyegemona.†

22 Adama wagaine alika giyegemona, e ada ide tomiyababi matatabu-moeda banae yana tubudelideli ani kaduwe kaalialika. Aku kaduwe anafaiweya, ide gavega taudeyavo kaawaegeda Keliso wagaine ke kadamana yana gabu wagaine kamiyamiya, ani Yaubada Keliso gisiveyawana alikeya anafaiweya, ide kaduwe gina siveyawada.

23 E ada kaliva seyana seyana yana tova yawa-vagila, ani gina yegemona Yaubada gisena anafaiweya. Keliso yana yawa-vagila wai ginagona, aku aimo Keliso yana yooyavo wai ina mulina. E ani Yeisu yana yewa-vagila anatoveya ani badi yana kalivayavo Yaubada gina siveyawadi.†

24-26 Ada gina sivemididida muline, Keliso gina vebutu gina veimeya, ada gilubodana Banae gina veiveimeya yana ehaveimeya wagaine analaba nibainavo matatabudi gina seobuyedi ke yadi toyogina gina avaina velemonoena, toveimeya seyana seyana ada ehaveimeya seyana seyana.† Ada anaebalauyabu-mowa Bana nibaina gina luyavulena, anavewaga 'alika'.† Ee, ada yana ehaveimeya gina atuegena Tamana Yaubada wagaine.

27 Tainei faina Buki Tabu wagaine givona, "Gaitoma matatabuna Yaubada gisedi Keliso age

† 15:20 1Tes 4:14 † 15:21 Lom 5:12,18 † 15:21 Iyo 11:25

† 15:23 1Tes 4:16-17 † 15:24-26 Sam 110:1 † 15:24-26 Ive 20:14

yavavane.” † Aku tova-nai givona, “Gaitoma matatabuna age yavavane” ani bademowa mamalina vaita Yaubada, Banae-nai gaitoma matatabuna gisedi Keliso age yavavane, ani keke Bana kadu Keliso age yavavane gida miyami, keke.

²⁸ Ada aimo tova-nai gaitoma matatabuna Yaubada bademowa gisedi Keliso age yavavane ina miyamiya, e aga Keliso Tauna ginasena Tamana age yavavane, e ada fafali matatabuna wagaidiya Yaubada anakaibemowa gina vetoveimeya gaitoma matatabuna wagaidiya.

²⁹ Taidei wana nuwanuwayena. Tubuiyamiyavo tufodi ani bademowa ialika, e ada malinai imi yawayawamiyavo wababibabitaisto badi yadi babitaisto faine. Aku kai aimo kaliva ialika ani keke inayawa-vagila, aga gavana faina taide dewa-nai wafaifaisewa ke toalika faidiya wababibabitaisto? Taidei ani velemonoena gaitomakavokavovo. E ada taumiyavo yami dewa-nai wagaine wavevewala vaita imi taumiyavo wave-tumagana toalika ani inayawa-vagila.**

³⁰ Yadayada seyana seyana keke ada velubwaibwaina aku todibusoyoga tova moyaina nuwanuwadi ina luvealikama. Aku kai yama yawa alikeya keke ada nuwenuwe, aga kekemowa ebagilagi wagaidiya ada awaawaegema.

† 15:27 Sam 8:6, Mad 22:44 ** 15:29 Wada kaliva tufodi adigiduwa-nai wagaine kaliva ibabibabitaisto toalika fatadi faina ani Paulo keke gida awaveiwakane aku yana ifufu wagaine givegugaiyena ke toalika adisiveyawa-vagila anavona velemonoena gina kiveyegemonina.

³¹ Tubuiyakuweyavo, imi faimiya gagakaikai, faina yaku gugai imi wagaimiya giveguwa e ada imi Keliso nodi waveseyana. Taidei vona vele-moena. Ada kaduwe seyana vona vele-moena, ani yadayada seyana seyana alika anavelemoena giyegeyegemona wagaikuya.[†]

³² Idedeku Efeso wagaine Iya kevakeva walawala nodi avemunumunuga.** Aku kai tauku gaga faikuya o kai tauku akuyegana faina nodi ada vemunumunuga, aga gavana anaiwakana wagaikuya? Kai anafaiweya wavonavona ada vele-moena toalika keke Yaubada gina siveyawadi, aga au “wa yada vemwamwala kana kanikani ke kana yuyuga, faina malabutu kana alika.” [†] E, kana alika-vagata. Keke kanayawa-vagila.

³³ Aku badi gavega ivonavona anafaiweya, ani keke wana vetumaganedi e ada ina fwayanegenegemi. Faina kai kaliva iwakana ginana kaliva koyodi nodi ina luluveyau, aga badi yadi dewa koyona gina damana banae wagaine, e ada bana yana dewa kadu ginakoyo.

³⁴ Nago-moena yami nuwanuwa ani tunutunugina, aku malinai nuwanuwa koyodi inuvuyoyemi. E ada yami nuwanuwa wana sedewedewedi ada wana vebutu wana nuwanuwa iwakana. Nuwanuwa kwavakwava wanasedi ada yami dewa koyona

[†] **15:31** 2Kol 4:10-11, 11:26 ** **15:32** Paulo kai givonaluvefosau tova-nai Efeso wagaine kaliva tufodi bana nodi ivevonavona Kauveya yana vona faine. Ada badi kaliva-dina inuwakoyo lakaina ke yadi nuwakoyo-nai faine iveanafaiweya kevakeva walawala. (Gug 19:23-41) [†] **15:32** Ais 22:13, Luk 12:19-20

anavegugai wana ilovau.[†] Taidei anafaiweya gavona faina tufomi ani aimo keke amifata nuwami ginamali Yaubada faine. Imi gavega wagaimiya gavonavona ani gilubodana wana vovomumu.

Yawa-vagila wagaine vovoda evagudi ani tulina.

³⁵ E aku kai tamo gaito gina toolidadana ginavona, “Gavaiyamu Yaubada toalika gina siveyawadi? Ada gavaiyamu vovodi anaita gina yegemona?”

³⁶ O kwavakwava. Gavana ubakulina ani keke vuvuna gina vegilili ke ginatabo iwakana aku nag-ona gina alika.[†]

³⁷ Ada gavana una bakulina ani keke aa-moena, keke. Aku aiyada waifei gagana una bakulina.

³⁸ Aku Yaubada waifei gigai gilukabukabu ada lukuna ke guwana vovona anaita givenuwadadana anafaiweya. E, aa-moena seyana seyana ginakabu anaita tulina tulina.[†]

³⁹ Kaduwe gaitoma seyana seyana wayawaidi, ani vovodi keke seyana aku tulina tulina. Ide kaliva vovoda tulina, kevakeva vovodi tulina, manuga vovodi tulina, ada igana vovodi tulina.

⁴⁰ Kadu anafaiweya gaitoma matatabuna imiyamiya wagaidiya, ani tufodi imiyamiya mwatuguya aku tufodi imiyamiya babiya. Ada gaitoma-dina imiyamiya mwatuguya ani adikaiwabu anaita tulina, ada gaitoma-dina imiyamiya babiya ani adikaiwabu anaita tulina.

[†] 15:34 Luk 15:17-18, Lom 13:11 [†] 15:36 Iyo 12:24 [†] 15:38 Eba 1:11

⁴¹ Tainei anafaiweya kauwana anakaiwabu anaita tulina, vaikoi anakaiwabu anaita tulina, ada ailabama adikaiwabu anaita tulina. Ada kaduwe ailabama ani adiita keke seya-moena, aku seyana seyana anakaiwabu anaita tulina tulina.

⁴² E, gaitoma matatabuna adiita tulina tulina, ada kadu anafaiweya ani toalika-dina badi aimo Yaubada gina siveyawa-vagiledi. Faina toalika vovona inatavuna babi wagaine ani gina abudalina, aku taine vovona-nai Yaubada gina siveyawa-vagilena ani wada tulina, keke gida abudali.

⁴³ Toalika vovona anaitavuna wagaine ani keke wa anakaiwabu, aku anasiveyawa wagaine vovona-nai anakaiwabu iwaka-moena. Kaduwe toalika anaitavuna wagaine vovona keke wa yana toyogina, aku anasiveyawa wagaine vovona-nai wa yana toyogina lakaina.†

⁴⁴ Toalika anaitavuna wagaine vovona ani babi analauboda, aku anasivemididi wagaine, vovona-nai gina yegemona ani yana miyami gabama analauboda. Vovo babi analauboda imiyamiya, ada kadu anafaiweya vovo gabama analauboda imiyamiya.

⁴⁵ E ada kaduwe anafaiweya Buki Tabu wagaine ivetokilumina, givona,

“Kaliva nago-moena bana Adama ani givekaliva ke yawaina ginuwagana.” †

Aku Adama wai gimulina ani Bana

† 15:43 Fip 3:20-21 † 15:45 Eba 2:7

givealuwaluwa ke yawai givelavelau.† Taine Adama-nai ani Yeisu Keliso.

46 Aku vovo gabama analauboda ani kaliva keke ida madunuwaga, aku vovo babi analauboda imadunuwagana. E aku aimo vovo gabama analauboda ina nuwagana.

47 Kaliva-nai nago-moena ani babi wagaine giyegemona. Yaubada babi wagaine gibubuna, ada bana babi anakaliva. Aku kaliva anavelu Banae wagabameya giobuelai.†

48 Badi gavega babi anakalivayavo ani anafaiweya banae kaliva nago-moena, babi anakaliva. Aku gavega tomiya gabama ani anafaiweya Banae gabama anakaliva.

49 Banae babi anakaliva anaitaita anafaiweya ani kadu ide adaitaita. Aku kadu anafaiweya aimoina ide adaitaita gina veanafaiweya Banae gabama anakaliva anaitaita.

50 Tubuiyakuweyavo, Iya tunutunugina ganavona wagaimiya ani taide anafaiweya. Vovoda-dina wa vidodi ke wa dayagidi, ani keke adifaiweya ina miyamiya Yaubada yana ebaveimeya gabama wagaine. Faina Yaubada yana ebaveimeya gabameya ada gaitoma moyaina wadedeku, ani keke ida abuabudalidi. Ada gaitoma-dina iabuabudala, ani keke meyameyaganina inana ina miyamiya gaitoma keke abuabudalidi nodi. †

51 Aku wana nogalina! Nuwanuwa seyana tuwaina-deya sewasewavuyena ani gana awamogatalena wagaimiya. Ide tovetu-

† 15:45 Iyo 5:21, 6:68 † 15:47 Iyo 3:31 † 15:50 Iyo 3:3-6

magana moyaida ani keke kana alika, aku aiyada moyai-moeda Yaubada gina sivedavedamada.

52 Taide sevedavedama-nai ani maduga-mowa gina yegemona, au mwatugu maufo-moena anafaiweya mata gina alovona, tova-nai Yaubada yana anelose kaula muliya-mwaeya gina yuvena. Faina kaula bonana wagaine,[†] au maduga-mowa badi bademowa ialika ani Yaubada gina siveyawadi alikeya,[†] ada vovodi-dina gina veledi ani keke-mowa aimo ina alika[†] o kai ina abudalidi. Ada ide aimo kamiyamiya wayawaideyavo ani kaduwe gina sivedavedamada.[†]

53 Faina vovoda-dina ikoyokoyo ada ialialika, ani gilubodana gina sevedavedama aku gina vevovo evaguna,[†] keke-mowa gina abudali aku miyamiyani-vagaina. E, vovo-nai kana osena.

54 Ada tova-nai wagaine vovoda-dina bade-mowa gina sevedavedama aku gina vevovo evaguna keke gina abudali aku miyamiyani-vagaina, ani Buki Tabu anavona seyana gina yegemona velemono, givona,

“Keliso alika nodi ilugaviya ada wai ginag-ona, e ada alika giluyavulena.

Giluyavule-yabuna!” [†]

55 “O alika, gadedeku ya toyogina ke kaliva una kiobuyedi ada una luvealikadi? Bade-mowa giavaina, giavai-moena.

[†] 15:52 Mad 24:31 [†] 15:52 Iyo 5:25,28 [†] 15:52 Luk 20:36

[†] 15:52 1Tes 4:15-17 [†] 15:53 2Kol 5:4 [†] 15:54 Ais 25:8

O alika, gadedeku ya toyogina ke kaliva una onadi?
Keke tamo. Evona wai unago-moena? Keke-mowa!" †

⁵⁶ Faina koyona ani vaita loulo-nai yavayavalata ani kaliva gina onadi, ada guwana ani ina alika. Faina koyona fatana alika. Ada dewa koyona anatoyogina vuvuna ani Yaubada yana veimeya anaiyawela.

⁵⁷ Aku Yaubada kana vesiuleyena lakai-moena! Faina Banae giimilina yada Kauveya Yeisu Keliso ada koyona ke alika gitoyogitagoned i faideya.†

⁵⁸ E ada tubuiya aseasekuweyavo, wana mididi toyogina ke yami vetumagana Keliso wagaine wana sevelavelalaina. Bademowa waalamanena vaita yada Kauveya matane, gugai-nai wagu-gaiyena Banae faine ani keke gugai-wayoga aku gina veguwa. E ada tova moyaina wa yami idibumwaiga taumiyavo wana awaegemi yana gugai wagaine.†

16

Tovetumagana adileme faina anavelekavovo.

¹ Kadu yami tolidadana seyana gana fatana, tainei velekaovo Yaubada yana yoo tabutabudiyavo faidiya, badi imiyamiya Yelusalema.† Totafalolo adiyoo tulina tulina Galetiya anafafaliya gaifufuyedi anafaiweya, imi kaduwe wanadewa anafaiweya.

† 15:55 Ose 13:14 † 15:57 Lom 7:24-25 † 15:58 Gal 6:9 † 16:1 Lom 15:25-26

² Wiki seyana seyana anayadayada nagona wagaidiya, imi seyana seyana yami mani tufona wana seseliyedi taidei velelavovo-nai faina. Kaliva seyana seyana ginaibou yana faisewa fatana anaetowava anafaiweya. Kai gaito fatana lakaina aga ginaibou lakaina, aku kai gaito kabisona aga kaduwe ginaibou kabisona ada ginamiya. E ada tova-nai ganaelai wagaimiya aga keke mani anavagauta faine wana nuwanuwa, faina bademowa seseliyena gimiyamiya velelavovo-nai faine.

³ Yami kaliva tufodi wa adivetumagana wana venuwadadanedi ke yami velelavovo anamani ina nauwena. Ada tova-nai ganaelai, aga yaku leta adiwaveiwakana faina gana veledi e ada yami nuwakabubu-nai nodi ina nauwena Yelusalema.

⁴ Ada kai anaita Iya kaduwe gadanau, aga badi ina kwayabuku nodi ananau.

Paulo gimatawedi yanana Kolinita wagaine faina.

⁵ Masedoniya anafafali gana balawalilivugina, e ada muliya imi wagaimiya ganaela gana madubodami.

⁶ Ada anaita imi nodi kanamiya, e au kai tulutulu anatova matatabuna wagaine nodi kanamiya, e ada muliya kai gadedeku gananau aga yami lema nodi wana imiliku.

⁷ Tova taidei keke nuwanuwaku ganaela wagaimiya gana miyalolomi, e ada nagona gananau Masedoniya anafafali gana balawalilivugina ayo

muliya ganaelai wagaimiya. Ganuwavetumagana kai Kauveya gina awaegeku, aga ineneku nodi kanamiya maita tova manamanawena.

⁸ Aku malinai ani idedeku Efeso wagaine ganamiya analaba Penitikosi anaebanuwaududu anayadayada,

⁹ faina idedeku yada Kauveya wana giyavuna faikuya ke yana gugai gagugugaiyena, ada giveveguwa. E, aku kaduwe kaliva tufona moy-aidi imiyamiya, ani taidei Kauveya yana gugai-nai ivevenibainena.[†]

¹⁰ Aku tova-nai Timoti ginaelai ineneku[†] aga wana itaveyabi-dewedewena, e ada bana keke wa yana matauta nodi gina miyami. E, imiyavo wa yami vemwamwala nodi wana vetubuiyanena, faina banae gigugugai yada Kauveya faine Iya anafaiweya.

¹¹ Keke gida luboda gaito seyana wagaimiya gina itavenuvenuwadadane vaita banae kaliva-kavokavovo e ada gina awatago.[†] Ada tova-nai yana miya ineneku gina avaina, yana tauya wagaine wana awanuwakabubuyena ke yami lemeya wana imilina, e ada wa yana nuwaniwalova nodi gina yewaelai wagaikuya. Iya gabodabodana ginaelai wa tubuiyadeyavo nodi.

Lauwage tulina tulina ada vetalakafoi.

¹² Aku tubuiyada Apolosa, ani galumodovena vaita tubuiyadeyavo tovetumagana nodi idaela ida madubodami, aku tova taidei wagaine banae

[†] **16:9** Gug 19:1-2,8-10 [†] **16:10** 1Kol 4:17 [†] **16:11** 1Tim 4:12

keke nuwanuwana ginaela. Aku aimo gava-toveya tova iwakana wagaine ayo ginaelai wagaimiya.

¹³ Wana itaita, ada wana mididi toyogina vetumagana wagaine. Wana asevatu, ada wana toyogina.[†]

¹⁴ Yami yauvivila moyaina ani wa yami nuwak-abubu nodi wana gugugaiyedi.

¹⁵ Waalamanena bana Setefano[†] ke yana manawa anatomiyayavo nodi ifuifufudi. Akaiya anafafali matatabuna wagaine ani badi Keliso imadu vetumaganena, ada taudiyavo iawaegedi velemoena ke Yaubada yana kalivayavo ilemelemedi.

¹⁶ Kaliva taide anafaiweya, ani gavon-avagadonemi ke wa yami aseawaega nodi wana vemoimoinedi velemoena ada bonadi wana noganogalina. Ika, biyavo-dina ada kadu badi gavega taudiyavo iawaegedi Yaubada yana gugai anavegugai wagaine.[†]

¹⁷ Iya gavemwamwala lakaina tubuiyadeyavo aditoto ielai, taine Setefano, Fotuna ke Akaika. Keke anafata imi wanaela, aku vaita aditoto badi iveagetoga faimiya ada ilakaelai wagaikuya.

¹⁸ Badi aseaseku ikivevatuna e ada wa yaku vemwamwala gamiyamiya. Ada kadu anafaiweya, imiyavo aseasemi ikivevatudi. Kaliva idewadewa taidei anafaiweya, ani gilubodami wana awaveiwakanedi yami yoo matadiya.

¹⁹ Totafalolo adiyoo tulina tulina idedeku Eisiya anafafali wagaine, ani yadi nuwakabubu wa-

[†] **16:13** Efes 6:10 [†] **16:15** 1Kol 1:16 [†] **16:16** 1Tes 5:12

gaimiya. Akwila ke vavinena Filisila[†] ada totafalolo ivagavagauta yadi manuweya, ani yadi nuwakabubu lakaina wagaimiya Kauveya anayeganeya.

²⁰ Tovetumagana moyaidi idedeku, ani yadi nuwakabubu wagaimiya. Imi seyana seyana nodi wana venuwaga wagaine, wa yami nuwakabubu tubuiyamiyavo wana vesiuleyedi.

²¹ Taidei yaku vona vetalakafoi ani Iya Paulo tauku nimakuya gavetokilumina.**

²² Kai tamo gaito keke yada Kauveya gida nuwakabubuye, aga alatabutabu gina nuwagana. O Kauveya, uda maduelai![†]

²³ Kauveya Yeisu wa yana nuwadoga gina lemelememi.

²⁴ Yaku nuwakabubu moyaimi wagaimiya, ide Yeisu Keliso nodi kaveseyana.

Iyayeku Paulo

[†] **16:19** Gug 18:2, Lom 16:3-5 ** **16:21** Paulo tubuiyana taidei leta-nai givetokilumina bana faine, aku anaebalauyabu wagaine Paulo feni givaina ada yana vetalakafoi givetokilumina e ada toveyawa ina alamanena banae tauna giimilina. Tainei maita 21-24 wagaidiya. [†] **16:22** Ive 22:20

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2